

I MAANZI ALIKO LYONSE

AAZWA KU MWAALA

 Tuli lumbide cifumo eci ku Busyu bwa Mwami Leza, kutegwa tu talike kufwambaana kuswaangana kwesu kwinda mu kutupa mulumbe, kutegwa—kutegwa tweeela “kuswiilila, kubatama” kumbele Lyakwe, kuteeti Walo ujisi cintucimwi caku twaambilila. Ndili masimpe kuti Ula cicita eco Nca kasyomezya. Ula libamba Ijwi Lyakwe lyoonse. Elyo tuli lumbide kapati ku kubungana antoomwe, katupona, alimwi ku lubazu olu lwa Butamani cifumo eci, alimwi kukonzya kukomba Mwami alimwi, akulibunganya tobени antoomwe a kumvwa kuzwa kuli Nguwe. Oto nto twaambo ncotu boola antoomwe, nku bukanze mbubonya obu.

² Lino, Nda baanga ndanjilila Mukwesu Neville, cakutalangilwa, sunu, nkaambo ka ciloto cimwi Nce kajisi. Kuti...Ndila syoma mu...Ndi...mu ziloto. Ndila syoma kuti Leza ulabeleka a bantu ku ziloto. Elyo Nda kajisi ciloto eigambya loko, busiku bwa zona. Kuti, Nda kali kubembeleka lubazu lwa cilundu, lubazu lumwi lwa cilundu, nkeya ku busena bwa kulida oko Nkwe keelede kuba a cisusulo cangu—cangu. Elyo Nda kabona kuti, mbuli Mbwe kaswena ku busena, ba kali kulizya ziimbo, nkamu ya bantu bakali kulizya ziimbo, kubelesya violini a kubotelezya bantu kuciindi niba kali kulya. Elyo kwakali cintucimwi kujatikizya ncico Nce taka botelwa, aboobo Nda ka ceenguluka buyo cintu. Elyo Nda kaswaana umwi katanta cilundu. Elyo Nda kalanga, elyo bantu banji bakali kutanta cilundu ku busena obu bwakulida. Pele Nda kabaanga ndaba tantamuka, kanyonena kululyo, ku, ku lumwensi.

³ Elyo kumwi, kunselelo mu kkuti, Nda kakonzya kubona cikombelo. Nda kamvwa jwi lya umwi, kaliti, “Muswaangane Mukwesu Branham amaswaanino ali boobu-boobu. Uli mukuselemuka cilundu kutala okuya. Elyo mwaambile cintu cili boobo-a-boobo.” Elyo Nda kabindila ku maswaanino aya.

⁴ Elyo cindi muntu nakayutuka, wakali Mukwesu Neville kasamide nsuuti yakwe ya bbulauni, kaboneka buyo mbuli mba libonya kakkede alya cifumo eci. Elyo wa kati, “Mukwesu Branham, ikuti na kuya kuba mu dolopo,” kati, “ciyooba ii—ii cintu cibotu kuli nduwe kuseluka, nkaambo Mukwesu Hank...” Lino, umwi alikke Ngwe zyi, Mukwesu Hank, Mukwesu Henry Carlson, tu mwiita kuti Hank. Kati, “Inga wayeeya kuti cakali ceenzu kuti toka swayi limbi cikombelo ikuti na

uyooba mu tauni, na mu dolopo kwa mazuba masyoonto.” Nda kasinsimuka.

⁵ Elyo, kuli ceeco, Nda kalimvwa mbuli bweenzu. Nseli kuyanda kwiingainga mu ciindi eco ca mvwiki, kusikila Nda buzya Mukwesu Neville ikuti na wa kajisi cintu cisalesale cifumo eci, ca mbungano. Aboobo wali siluzyalu, mbuli lyoonse, watu, “Koboola kunselolo.” Aboobo, twa boola buyo. Nda kamutumina cakumuka masikati aajilo, a kuboola cifumo eci, cakutalangilwa kuli onse wesu.

⁶ Lino Ndi syoma kuti inga caba cintu cibotu, kuli ndime ku baanga nku—nku pandulula zintu zimwi kuli ndinywe. Ndi, yeeyelwa, kuba muntu uugambya maningi ku bantu banji. Elyo Ndi baanga ndagambya kuli lwangu, akwalo. Nkaambo, Ndi sola kutobela busolozi bwa Muuya Uusalala, camunsi buyo mbuli Mbwe konzya. Alimwi eci citu bamba kuba bagambya, mwabona. Tula cita zintu nzo tu—tu kkalila ansi ncobeni a kugambwa ziindizimwi, “Nkaambonzi Nce cita cintu cili boobu? Mbobuti Mbwe sola kucita cintu cili boobu?” Elyo ndyoonya buyo inga wayeeya kuti wakacita nciconya eco ncota keelede kucita. Pele ikuti na waba buyo alukakatilo, a kuba alusyomo, alimwi uli masimpe kuti Leza waku solelola kucicita, uyo cijana kubeleka buyo kabotu ncobeni. Mwabona? Elyo ziindi zinji tula cijana eco. Elyo Ndi lizi Mukwesu Neville waka cijana eco, ziindi zinji. Elyo basololi a bantu basimuuya bala mvwisya eco.

⁷ Cakali ciindi cimwi mu buumi bwangu obo... Mukasimpe, kuzwa Ne kali musankwa, Nsena sola kulimvwa kusololelwua nkukonya oko nko Nde elede kuponena mu—mu Jeffersonville. Kwa kali kubula coolwe, kuli ndime kusola kuponena okuno. I busena butaanzi, kraimeti taizuminani cabubi a ndime. Cintu cimbi, kuboneka kuba kutyompwa kwa muuya.

⁸ Ikuti na wajokela kubusena bumwi okuno, ikuti na tii bwaka nyonyoonwa muciindi ca muyoba, kuli lugwalo luli kooko, ndo Nda kajisi, kwiitwa kutaanzi mu mulimo, Nda katalika kuzwa. Elyo Mukwesu George DeArk a Ndime...

⁹ Elyo banyina ba Mukwesu Graham Snelling, Mukwesu Hawkins weendelezya filing'i sateshioni mu New Albany, a bantu banji, bakandi swaana anze lya busena buniini bwa kuswanganina ku mipailo okuno. Elyo akwalo kuti, ikuti na Nda ti, inga bazumizya bana babo ku tafule, ku—ku yaka cikombelo, kutegwa kaba takonzyi kutolwa kuzwa ku busena kuyaku busena.

¹⁰ Cindi ni Nda kamvwa oyo mutumbu muniini, a muvwanda umwi kajisi ku janza lyakwe a limwi ku kuboko kwakwe, kwaamba kuti inga wayanda kuzumizya bana bakwe ku tafule, kutegwa bayake busena oko nkoba konzya kukkala a kukombela, kwa kaindila maningi kuli ndime kwiimikila.

Aboobo Mukwesu George a Ndime twa kaba antoomwe a kupanga muzeezo wakuti tukkale akuyaka cikombelo.

¹¹ Elyo cindi cikombelo nica kayakwa, lyoonse cakali kubaanga...I cifumo Ne katuula cikombelo, cilengaano cakasika, eco cilembedwe acili mukati ka ciswi cabuyake alya, cindi Muuya Uusalala niwa kandaambila kuti, "Eci tacili cikombelo cako." Mwabona? Elyo Nda kabuzya oko kwakali cikombelo cangu, elyo Wa kandi kkazika ansi kunsi lya milengalenga ya bbulu iimweka. Elyo mpawo Wa kat, "Cita mulimo wa muvangeli," abumwi, mbuli mbo muzyi. Kuli lembedwe akwalo mu mabbuku.

¹² Zyonse ezyo zintu kubikkwa antoomwe. Elyo buzuba bumwi cindi Ne kali kumwa bwizu mu lubuwa kutala okuya oko Mukwesu Wood nkwa kkala ono, elyo bamamazyala bakali kukkanla okuya ciindi cimwi, Nda kakkala aa matantilo akusule; matantilo masyonto akkonkiliti akaindi, kuti Nda kayakide busena obu buniini alya bwa bamamazyala. Elyo bakali kubaanga mba sikulanga mbungano ku ciindi eco, kwi ibamba. Elyo cantangalala mbuli umwi mbwa konzya ku kanana, Jwi lya kaamba kuli ndime, akuti, "Nse kakulongeziy kufumbwa kuti ko cino kkala okuno. We elede kuli pambula omwini kuzwa ku bantu bako a busena obu." Ee, Mebo, eco cakandi zapaula buya, kutandila mvwiki a ziinda.

¹³ Cakuzumanana, ciindi conse, Cintucimwi cakandi cenjezya, "Ko zwa, ko zwa. Ku tozya kumbo. Kozumanana kuya kumbo." Ee, Nda... Ca kandi penzya lyoonse. Elyo kulibonya mbuli kuti ciindi conse...

¹⁴ Lino, Nda kacisalazya mu mizeezo yangu kuti mvwiki eyi Ndila ulukila ku Tucson, oko Nkwe keelede kujana busena bwa renti, kuba kokuya mapeyo aya; kuyo tola bana ku cikolo, kutalikila mu Kavumbikaniini. Nda kajisi busena. Kwakali busena abwalo bwaka pegwa kuli ndime okuya. Pele kuli cintucimwi eco... Elyo—elyo ikuti na Nda unke...

¹⁵ Cintu cimbi Nce yanda kwaamba. Katu taninga kuyanda eyi ng'anda atala awa, buyake bwa mupaizi, awo mpo bubede eno, Nse yandi kuyakila okuya. Bamamazyala bakali cembeede. Elyo waa kalilila nokuba kujatikizya ncico, waa kat, "Nse konzyi kubasiya okuno bamaama, ku kuziba kuti bakali cembeede, alimwi nibata kabambwa kabotu." Ee, Nda kacimvwisy eco. Nda mvwisya. Abo mbaanyina, a banyina balikke mba kasola kuba abo, na kuyo sola kuba abo. Aboobo, Nda kamvwisy obo. Aboobo Nda—Nda kakomba ku Mwami, Nda kat, "Mwami, mukuti Nse buyandi busena," Nda kat, "kondi kkutya. Njo inka kuli konse Nko yanda kuti ndiinke, kuzwa kuli konse. Pele Nse yandi kunyonganya mukaintu wangu, ku mugwisya kuzwa okuno, omuya mu cisi ceenzu oko nkwa tazyi uli onse. Elyo

mpawo inga Nse ko ziindi zinji, nekuba. Kondi kkutya kuba kookuno anguwe.”

¹⁶ Elyo ono, cindi banyina niba katolwa, nkabela bakainka ku Bulemu, mpawo kwakasika nzwango alimwi, mwabona, ono kuyabuya. Nse zyi eco cakucita.

¹⁷ Elyo mpawo buzuba bumwi cindi eyi njisyo bakwesu njeba bakatalika konse, Nda kaimikila kuzwa ku cikambaukilo ciindi cakainda Ne kali kokuno aku mwaambilka kuti Nse kabi ku masena akubelekela kufumbwa kuti eyo kaiyabuya. Aboobo, bakwesu baka ilulamika eyo yonse caluzyalo. Ya kasalazigwa yonse. Mu maora ali makumi obile aone, yakali manide.

¹⁸ Lino eco cijula masena akubelekela alimwi kuli ndime. Nse zyi eco cakucita. Nse zyi nzila yaku nyonena. Nda kalomba Mwami kuba a cilengaano. Nda ka Mu lomba kundaambilka eco cakucita. Pele Undi lekela kukkala buyo.

¹⁹ Lino, masiku aindi cindi Ne katola bana boonse, mukaintu wangu a aboonse, kuzwa mu ng'anda, Nda bamba kulipa ku Mwami Leza. Elyo Nda kati ku Mwami Leza, “Ikuti na Uyo ndileleka munzila eyo Nje unka, Njo Ku belekela. Pele Uyo nditondezya oko kwa kwiinka, a nzila mwa kweenda, a cintu cakucita.” Aboobo, Nda lipa lwangu ku Mwami. A i—a mulimo a zyonse, Nda utuula ku Mwami. Elyo Nda kati, “Kufumbwa Nkoya kujula, kufumbwa Ncoya kucita, Njo endela munzila eyo. Kusikila Uka bambe nzila, Njo zumanana mbuli Mbwe bede kusikila Uka bambe nzila.” Elyo Nda ka Mu lomba ku cisalazy ka kuti Nta kacengwi mpawo, nkambo ncobeni Ndi syoma kuti tuli nkoonya ku maswaanino a cintucimwi kuti cicitike.

²⁰ Nda cimvwa kacisinsimwa cifumo eci okuno kwinda ku Mukwesu Neville, na kucipa oko Nkwe kazyi kuti cakali—cakali cisinsime eco nca kali kutondeka. Lino, nkikaako, Nda kamukombela nyoonse, alimwi Ndi yandikana ndinywe nyoonse kundi kombela, kutegwa Muuya Uusalala ukandi soleole nkukonya kwini Nkwe elede kuunka, aceeco Nce elede kucita, kutegwa Nta kalubizy.

²¹ Nywebo mwabona, ziindi zinji, bantu bayeeya kuti cipego ca businsimi, nkuti Leza waamba buyo kuti, “Njo kubweza kuzwa awa, a ku kubikka ansi awa. Lino koinka buyo mpoonya awa.” Elyo Wa kwaambilka zintu ezyo zyonse. Ikuti Na kacita, mpawo ino ni nguzu nzi zyakuzunda nzo jisi? Mwabona? Mwabona, nywebo, Ula kulekela kwiimikila olkke kwinda umwi umbi. Mwabona? Nyoonse inga mwa boola kuli ndime a kubuzya zintu zimwi, nkabela Tana mukacilwa pele Wa kamupa bwiinguzi. Mbo mbubo. Inzya. Pele Nda konzya ku Mu lomba zintu zyangu, alimwi ziindi zinji Undi leka buyo endikke, mwabona, undilekela buyo kuzumanana a kweenda muli njiyo.

²² Ndi jisi zintu ono Nzye elede kubamba lwangu, a kusala Nkwe elede kubamba. Elyo eci ncipati loko, kusikila Nse konzyi

ku cimvwisya kabotu kusikila Nda ba masimpe kuti Nguwe ukana kuli ndime. Elyo Ndi—Ndi... Ta kandi pi cilengaano. Walo undilekela buyo endikke. Aboobo Ndi kkede buyo mbuli mucaala, mbuli, cifumo eci, Nse—Nse zyi nzila yaku nyonena. Aboobo, Nda ituula ku Mwami.

²³ Nda—Nda kalimvwa obo mpawo, ku kulota kuti, Nde elede kujokela okuno ku cikombelo a kugwasya Mukwesu Neville kusikila cintucimwi cimbi cacitika buyo mu mugwagwa. Aboobo, Ndi nooli ambali.

²⁴ Nda lomba Mukwesu Neville ciindi cisyoonto cainda, “Ino mbungano iya buzwidilila buti?”

Elyo wati, “Kabotu.”

²⁵ Elyo aboobo Ndi mvwa kuti mucijisi zipego zya kumuuya a zintu akati kanu, ezyo zibeleka, zipego zya businsimi, a—a kwaamba myaambo, a bupanduluzi bwa myaambo, oko nkonda zwaa kumvwa ciindi cisyoonto cainda. Elyo ezyo zintu zigwasya mbungano, alimwi kapati.

²⁶ Pele Nda yeeya kuti, ndiza sunumasiku inga Nda, ikuti na Mukwesu Neville... Ikuti na Muuya Uusalala tiwa tusololela mu cintucimwi caandene, sunumasiku Ndi yanda kuba ii... Nyewe nyoone, kamutana kuzwa cifumo eci, kulemba mubuzyo a kuubikka awa, mubuzyo umwi mu mizeeo yako, kutegwa tu zibe eco mbungano nci yeeya. Eyo nje nzila beembeli mbo bajana eco cili mu myoyo ya bantu. Elyo umwi aumwi wanu ujisi mubuzyo, koulemba a kuubikka awa. Ikuti na to jisi pepa ku—ku lemba cifumo cino, mpawo ulembe sunumasiku, cakufwambaana. Aboobo, Ndi yanda kuba a ciindi cinji mbuli Mbwe konzya, ali njiyo, kwilangalanga a ku mwiingula munzila ya Malembe.

²⁷ Mpawo ikuti na Mwami wayanda, ikuti na Leza wayanda; Nda kaamba kaambo okuno kutali kaindi kalamfu kakainda, kuti Ndiyo yanda kukanana kuli ndinywe aa Zinamatizyo zili ciloba zyamamanino aa i... zya Ciybunuzyo. Lino ikuti na twa... Nse kakonzya zyonse kwinda mu Zinamatizyo ezyo mwaka uno, nkaambo citola kuzwa ku chipati ca 6 ica Ciybunuzyo, kwinda mu i—kwinda mu chipati ca 19, kusika mu Zinamatizyo ezyo. Pele zyatatu na zyone zitaanzi inga zyaingulwa mu busiku bomwe, Mbwe yeeya, acimwi Cinamatizyo kuba busiku bomwe.

²⁸ Lino, ikuti na twa mvwisya, kubona awo akwiimina mpoonya a Bbuku lya Ciybunuzyo, oko Mbungano nkoya katolwa mu Bulemu, mpawo zimwi zyaco zibeleka a bama Juda, kutali a Mbungano pee. Nku beleka a cisi ca Bajuda. Nkikaako tweelede kuyo boola ansi, kuzwaku Kukwempwa kwa Mbungano, a kutola... Tula bona awa cicitika muciindi ezyo Zinamatizyo, a ciindi ca Mbungano ya Bamasi. I Mbungano mu kuunka kale; alimwi a cisi ca Israyeli, cila joka akuleta Israyeli

kuzwa ku ciindi ni caka zisiya, kusika ku ciindi cabusyaasunu; a kuboola kwa Mesiya, cindi baku tambula Mesiya.

²⁹ Lino mwacimvwa na? I Mbungano itolwa kujulu. Leza wakabeleka lutaanzi a Mbungano, Makkalo aa Mbungano. Twa kaabweza ayo. Mpawo Mbungano yatolwa kujulu mu Bulemu. Mpawo Muuya Uusalala wajokela a kubweza Israyeli, mbuli cisi. Elyo uileta ansi kusika boobu, kuciindi Cilalilo ca Mucado cano citika, elyo mpawo ku Zijosya alubo ku ciindi eco cakumamanino. Ndiyo bikka bbulakiboodi yangu, akukonzya ku cidulowa aku ciyiisya, eelyo cindi caakusika. Mpawo Mwami uya kubweeda a Nabwiinga, a Israyeli iyo mubona. Elyo, oh, ino ciyooba ciindi eco!

³⁰ Lino, katutana kuswaanganya kabotu eci mukati, kuli ciyo cipati eco cilebya loko basilwiyo lwabukombi a banji, a bamaiyi muciindi ca bukkalo, a bantu ba Mbungano ya Kristo abaabo baboola kumvwa ceeci, cakuti, Mvwiki zili makumi Aliciloba zya Danieli. Tu jisi... Ta tukonzyi kuya ambele mu Ciyubunuzyo kusikila twa swaanganya Nabwiinga a Israyeli antomwe a Mvwiki zili makumi Aliciloba zya Danieli. Elyo ndiza, na Leza wayanda, kutegwa na Wa elela kukanana kuli ndime kuciindi ciciza, ku kanana ali zeezi Mvwiki zili Makumi aliciloba... na, kutali Mvwiki zili Makumi aliciloba, pele Zinamatizyo zyamamanino zili ciloba. Mpawo Munondo mutobela, Njo sola kubweza Mvwiki zili Makumi aliciloba zya Danieli, Munondo mutobela, na Mwami wayanda. Elyo mpawo eco ciya kujula masena mpawo, ikuti Wa elela kutu sololela, kutali ambi. Ee, tuyu kuziba kuzwida awo.

³¹ Mukwesu Neville a Ndime tuno belekela antomwe ali ceeci, a kucita zintuzyonse nzo tukonzya ku lugwasyo lwa bantu.

³² Lino, kujokela acimwi ciindi, tula kombela baciswa, lyoonse tula botelwa kucita ceeco. Elyo antela Njo cicita mu muswaangano onse, ikuti na kabacisisidwe, ku bakombela.

³³ Nse ciyandi limbi kuba a kutweluka. Mwabona, ono nceeci caka citika. Nda kasola. Elyo Ndi lizi cuti Nda kacita zintu zilubide; pele Nda soleka kupona munsi loko kuli Leza ciindi coonse, kuli Leza, nje nzila ezi zilengaano mbo zicitika, obo mbo ziya kucitika. Nobaba bantu inga basweekelwa zintu aku ndiita, akundilomba kukomba ku Mwami, kulomba kuziba mpo zyakabede. Mbuli Jese naka sweekelwa kambongolo, elyo balombe baka selemuka kuyo jana musinsimi, elyo wa kabaambila oko tumbongolo cuti twaka pilukila ku muunzi. Abumwi bumbi mbuli obo, oko kuli kabotu cakulondoka. Pele kuba maningi kwa nkuko, bantu banji maningi... Kutali buyo mibusena mbuli obu; ni nyika yoonse, mwabona. Aboobo ciba buyo, kuzumanana kundipa kukatala maningi, elyo mpawo ku kubikka nkoonya kumanenekela ciindi conse, kusikila kuboola kubusena...

³⁴ Elyo nci cakacitya bakwesu kujana njiisyo yaka talika, kuteeti Nda kali Mwami Jesu Kristo wakalifungula mu mubili. Elyo tu lizi kuti eco inga camwaya buyo Mulimo mu tubeela, a kuleta sampa kuli Kristo a zintuzyonse. Mwabona? Aboobo ako nke kaambo Nda kaba zungaanya kapati, kuti bacileke mpoonya awo, aku bazibya kuti eco tii cakali ca Leza, eyo yakali ya dyabulosi. Mwabona? Elyo balo mbantu babotu. Elyo citondezya kuti bantu abo bakazyalululwa aa Muuya wa Leza, nkaambo, cindi niba kabona Bwini ku Malembe, baka jokela kuli Leza, incobeni, mwabona, cakufwambaana. Aboobo, eco citondezya kuti Saatani wakali kusola kucita cintucimwi ku bantu; boonse bakali bantu, banaleza Banakristo.

³⁵ Elyo cakabamba bunji bwabo kundaambila kuti, “Mukwesu Branham, tu jisi kaanzambwene loko ono muli nduwe kwinda mbo twa kajisi.”

³⁶ Nkaambo, mwa bona cintu, a cipego eco Leza ncaka ndipa, ino ni Nda kacita nzi a ceeco? Kawaala cisi ku matende angu, na, bantu. Eco nco twiita kuti *cisi*, taili “kosimosi” awa, i—i cisanizya ca mu nkondo azimwi. Nda amba Banakristo, musyomi wini, oyo ujisi kriimu wa i... Tu kanana *cisi*, tu kambauka zya “bantu bakazyalululwa,” nce ncico ncotwa ambaula, *cisi*. Kutali bantubonse awa, a basofwi a babi loko cakuti tu pona mu inyika, olo ndu—olo ndu suko buyo lwa nyika kuya bujokela. Nda ambaula kujatikizya Banakristo bakazyalululwa, bantu abo Banakristo beni.

³⁷ Ndi lindila muntu usotokela ali ndime alubo kujatikizya cintucimwi. Umwi wakasika kuli ndime calino, akuti, “I nguonya muzeezo, wa Kristo wa kuswida ansi, a mate Aakwe, a kubumba bulongo aku buzila ku meso amuntuumwi.” Kati, “Mbocili cisofwi, kali tombe elyo, kuli Nguwe kuswida, a mate Aakwe azwa mu mulomo Wakwe! Obo mbo cakali cakusofwaazya, kuswida mu suko, a ku bumba bulongo a kububikka ku meso aa muntu.”

Nda kati, “Pele wa kabweeda kabona.” Mwabona, nce ncico.

³⁸ Elyo oyo muntu nguwenya! Ba kajula cilabba caba tasami zisami kutala okuya munsi lya busena bwangu, nywebo mulizi, swiming’i puu. Elyo—elyo oyo muntu ujisi tiketi lya umwi aumwi mwana wakwe uselemukila okuya a kusamba mu ciziba eco. Elyo walo a mukaintu wakwe baunka, abalo, mu ciziba eco. Mundi jatile, nobacizi bangu. Pele oko banakazi nkoba yamba, kutandila bali mwaanda, na yobilu, a buzuba; banakazi, boonse busofwi obo a zintu, alimwi banakazi basunu, a kuwashaa konse mu manzi ayo, obo busofwi a tombe mu milomo yabo, a kuzimena a kuzi swida. Ndi yanda kuti asotokela ali ndime, mwabona.

³⁹ Ba kati, “Ikuti—ikuti na Kristo wakali kupona sunu, nibaka Mwaanga ku kaambo a cintu eco cakusofwaazya zintu.”

⁴⁰ Ino kujatikizya *ceeco?* Ndili masimpe mwa cijata Nce pandulula. Bala inka moonya mu ciziba eco, alimwi bunji bwabo a malwazi, sifilisi, gonoliya, azintuzyonse zimbi, moonya omuya. Elyo ku ciswida buyo kwiinda mu mulomo wako, a zintuzyonse mbuli ezyo, a kusanzya konse omuya mbuli boobo. Elyo nzyakusalazya, mubwini?

⁴¹ Aboobo, oh, ma, obuno buzuba mbo tuponamo, mukwesu, mucizi! Nciindi ca Kuboola kwa Mwami! Elyo Mbungano ijisi bulangizi bomwe, nkabela obo mbwa Kuboola kwa Mwami.

⁴² Ee, Nse konzyi kuleka zintu ezyo; ta kuyandikani. I Bbaibbele lya kaamba kumbele kuti bayooba kokuno. Nse konzyi kubalesya. Pele Ndi yanda jwi lyangu libe a rekkordi ku Julu, kuteeti Nda kali kucilwana, cindi caku boola ku Lubeta. Nda kali kucilwana.

⁴³ Ndi cisyoma kuti eli Bbaibbele ndi Ijwi lya Leza. Mpawo taakwe cintu cimbi mu inyika, ciimpene kuli Ndilyo, cikonzya kusola ku Li lesya. Pele eli Bbaibbele awa, obu Mbwini, eli ndi Ijwi lya Leza. Aboobo lino atu kwele mu ziyambyo zyesu—zyesu—zyesu, a kusimpa aniini ku nkomwe ya luumuno iya Mayusilo a Kulyookezya. Elyo—elyo inga twa enda kuzwa aa meenda juunza kubusena bumwi, pele atu simpe buyo lino a kuswiilila Ijwi lya Taata wesu Wakujulu mbuli Mbwa kanana kuli ndiswe kwinda mu Ijwi Lyakwe, tula syoma, asunu.

⁴⁴ Elyo sunumasiku, ono, libambil akufumbwa mubuzyo muniini ngo jisi. Lino, kutali cintucimwi ciya kucisa umwi. Ikuti na wa cita ceeco, mpawo eco... Inga nseingula oyo, ku kutalika, mwabona. Pele yebo, *cintucimwi-cimbi*, kwaamba, “Ee, ono, ikuti na Nda cita cintu cili boobu, sena Leza waamba kuti tweede kucita ceeci?” Na, nywebo mulizi, mibuzyo miniini ili ku moyo wako. Na, “Tu jisi zipego zibeleva a ndiswe, Mukwesu Branham, nkabela sena tweede kucita ceeci?” Cintucimwi eco Nce konzya kuvviila mu Lugwalo, nywebo mwabona. Lemba cintucimwi ciniini. Njo kkomana. Alimwi ikuti na taakwe, nkokuti Njo bweza buyo ciiyo ca musyobo umwi, a kukambauka kuli ndinywe sunumasiku, na Mwami wayanda. Omu Munsono, alimwi Nda kali... .

⁴⁵ Munsono mwainda Nda katalika kuya kuli bwa Mukwesu Cauble. Elyo Nda kamvwa kulila kwa mulangu wa mbungano eyi, elyo Nda keenda buyo kutanta a kuseluka mu lubuwa. Nse kakonzya kuciiminina. Oko kwakali konse. Nda kakumvwa, aboobo Nda—Nda—Nda kacita kuselemuka.

⁴⁶ Aboobo ono atu kotamike mitwe yesu ono a kukanana ku Mupangi wesu, elyo mpawo mu majwi a mupailo. Sa umwi ujisi nkumbizyo nsalensale? Kotambika buyo maanza ako, kwaamba buyo kuti, “Nda... .” Ko izibya buyo. Leza ulizi cili ku moyo wako. Lino kobikka buyo nkumbizyo yako mu mizeezo yako.

⁴⁷ Leza Uusalala Kapati, Oyo wakalenga Majulu a nyika ku Ijwi lya mulomo Wako, ku miyeeyo ya muzeezo Wako, Twa boola mu Busyu Bwako, kwinda muli Jesu Kristo, Mwami wesu, kuli Nduwe twa lumba kuli zyonse Nzyo katu citila. Alimwi tuli lumbide kapati kuli Nduwe, Mwami, cifumo eci, kuziba awo mpo twiimvwi, kuziba busena motubede cifumo eci, a makani aciindi, aciindi ciza. Mukuziba kuti sunu, ku luzyalo lwa Leza, twa kasanzigwa mu Bulowa bwaku Kalivari, kuti tuli libambilide, a lusyomo mu myoyo yesu, kuyo Mu swaana ikuti na Wa sika sunu. Twe elede kwaamba kuti, “Nokuba booboo, boola, Mwami Jesu.”

⁴⁸ Elyo tula cibona cibi kacilundana, kusikila kwaboneka kuti inyika iladadalika kunsi lya munzuwe wa cibi. Obo kunywa a kuuma njuka, a kupakazya, a zintanda, alimwi, O Leza, busofwi, a tombe a bubi bwa bantu. Elyo abo balo, ikuti na bakonzya buyo kuziba, Mwami! Sena aba bantu, balo basama zisani mbuli ezyo zibyaabi zyakaindi ziniini, akuzwa kuya mu tugwagwa, kuti bala mvwisywa kuteeti tabali cintu ccita buuka a suko, kuti ndiza mu mvwiki imbi buuka buya kulya mibili oyo ngoba lemya maningi? Sa mulizi kuti zivunyungwa ziya kuulya, nkabela bubotu bwabo buyooba kulaale mu Butamani mutakwe Leza, mutakwe Kristo, mutakwe bulangizi, kubbila kunsi mutakwe bulangizi pe, ccita buyo kunyonyooka ku Kuboola Kwakwe? O Leza, ko tupa majwi aa—aa ku cenjezya, kutegwa tu cenjezye muntu aumwi ku ntenda eyi njo baswenenena.

⁴⁹ Koba a ndiswe sunu. Ko tupa “majwi aa busongo,” mbuli Solomoni lomwe mbwa kaamba mu Mukambausi, kuti tuyoooba “bayasi basongo,” kuti tuyoooba “beembezi ba mbunga eyi.” Elyo twa lomba, Mwami, kuti mbuli mbo tu yandaula majwi akuti, kuya kuba—kuya kuba zipange zilondo ziya kujata moyo oyo ubulide maningi okuno cifumo eci.

⁵⁰ Tee twaboola a kubungana kunsi lya ciluli eci cipywa sunu, kuzo bonwa buyo, peletwa boola okuno nkaambo tula Ku yanda, alimwi nkaambo tu yandisa kumvwa kuzwa kuli Nduwe. Uli Muyandwa wesu oyo ngo tuyanda, alimwi tu yandisa kumvwa Majwi azwa kuli Nduwe. Tuli lumbide kuli ceeco nco twamvwa kale. Ciya kukkala andiswe kwa ciindi cilamfu. Lino tupe caabilo eco Nco tubambilide sunu, mbuli mbo tulindila ambele kuli Nduwe. Twa cilomba mu Zina lya Jesu, aku kaambo Kakwe. Ameni.

⁵¹ Ono cili...[Ii mucizi wakanana mu myaambo imbi, mukwesu wapandulula—Mul.]

⁵² Tuli lumbide ku kusumpula oku kuzwa ku Muuya, bala twaambililaaku tucenjezya kujata Majwi kuti kwayanda Muuya Uusalala uyo kanana kuli ndiswe sunu. Alimwi ta tuzyi eco Nca tu bambilide, pele tu lizi kuti kweelede kuba cintucimwi eco Ncaya kuleta. Kwayanda mubuzyo uli mu mizeezo yako, kuti Uyo cikanana kwinda omuya. Inga wa caamba kwinda

mu Mulumbe cifumo eci. Inga wa cikanana sunumasiku ku kuswaangana. Walo, kumwi munzila sunu, Uli mukusola, kuboneka mbuli, kucenjezya umwi uujata Majwi.

⁵³ Lino kuvununa Ijwi lilembedwe, atu unke mu Bbuku lya Kulonga, kwa ciiyo Cakwiyya Munsondo.

⁵⁴ Sena ujisi mulimo wa kubbizya? [Mukwesu Neville wati, “Peepe, ccita kusikila sikisi okuloko mangolezya aya.”—Mul.] Peepe. I mulimo wa lubbizyo aa sikisi masikati aya.

⁵⁵ Atu unke ku chipati ca 17 ica Kulonga, akutalika a i—a kampango ka 5, Nda syoma, tumpango twa 5 a 6 itwa chipati ca 17 ica Kulonga.

Elyo Mwami wa kaambila Musa, Kozumanana kuya kumbele lya bantu, a kwiinka a baalu ba Israyeli; a musako wako, oyo ngo kaumya mulonga, tola janza lyako mukati, a kuunka.

Bona, Njo ima kumbele lyako... atala lya mwaala mu Horebu; alimwi... uyo uma mwaala, nkabela okuya maanzi ayoziwa kuli nguwo, kutegwa bantu banywe. Elyo Musa wakacita boobo kumeso lya bamaalu ba Israyeli.

⁵⁶ Lino ikuti na Ndi ite cibalo eci ciniini Cakwiyya Munsondo, Ndi yanda kubweza eci mbuli ciyo ca kwiyya cifumo eci, *I Maanzi Aliko Lyonse Aazwa Ku Mwaala*.

⁵⁷ Tu lizi kuti Israyeli wakali mukozyanyo wakaindi wa mbungano. Nkaambo, Israyeli bakali bantu ba Leza kusikila niba kazwa mu Egepita, elyo mpawo bakali mbungano ya Leza nkaambo baka pambulwa kuzwa kuba bamwi banyika.

⁵⁸ Elyo cindi twa pambulwa kuba kuli bamwi banyika, mpawo tuba mbungano. Pele kufumbwa kuti katu njilene abamwi banyika, mpawo ta tuli mu mbungano. Lino Ndi syoma kuti eco cila sakana kapati, cila jata buesna bwaco. Mwabona, ta tuli mbungano kusikila twa pambulwa kuzwa ku nyika. Kulipambula tobeni, kuzwa akati ka bantu batasalali, muta beleki a mbabo, alimwi mutabi basicaablo ba zibi zyabo. Mutali sungi mujokwe a batasyomi, pele amuli pambule nobeni kuzwa ku zintu zya nyika.

⁵⁹ Elyo cindi Israyeli niyakali mu Egepita, bakali bantu ba Leza. Mpawo cindi niba kaitwa kuzwa, na niba kajisi kulonga, kabazwa, mpawo bakategwa mbungano, nkaambo cakali ciindi eco niba kalipambula beni kuzwa kuli bamwi banyika.

⁶⁰ Elyo ndilyonya bbala *mbungano* lya “kwiitwa kuzwa.” *Kulonga*, “kuzwa.” Umwi aumwi wesu, mbuli Banakristo, kajisi kulonga mu buumi bwesu. Twa kajisi ciindi oko nko twakali kwiitwa kuzwa akati ka balongwe besu, kwiiitwa kuzwa akati ka bantu abo mbe twa kali kuswaangana abo lumwi, a kuba bantu bandeene, a kweenda a bantu bandeene baka lilemeka nzila

yandeene a kwaambaula mu nzila yandeene. Kwa kali kulonga mu buumi bwesu.

⁶¹ Nguonya mukozyanyo mubotu wa Israyeli ngo utupa, wa cindi Leza naka baita kuzwa. Ba kajisi kulonga, nkabela bakazwa akati i—i bantu ba inyika, a kuba cisi cakapambulwa, kuya kuli Leza, bantu basalesale. Ba keenda kensi lya zimvule zya cuuno ca luse. Ba kapona a kweendela ku Musumpululu mupati wa Mulilo. Elyo Leza waka bagwisya kuzwa mu Egepita, kuyaku nyika eyo Nja kasyomezya.

⁶² Elyo, mu kulonga oku, baka pegwa musololi simuuya, musololi, oyo wakali Musa, musinsimi mupati wakananikidwe oyo wakali ii—ii muntu mulemu. Wa kali muntu munaleza, wa kazyalwa kali muntu munaleza. Leza waka mwiita kuzwa kuli banyina, nokuba ciindi eco kacitanaba; Leza wakali musalide kuzwa ku malengelo aa inyika, kukuba musololi ku nzyalani eyo, kukuleta kulonga oku ku bantu.

⁶³ Okuno ciindi cimwi cakainda, Nda akanana ku bana baniini okuno mu cikombelo, alimwi kajisi nkambauko niini ya mbabo; a kwaamba, na kupa bupanduluzi buniini bwa nzila Jokibedi, obo mbwa kakomba, walo a Amura, wisi Musa, kujatikizya kucita cintucimwi ca kuvunwa kwa bantu. Elyo Amura wakabona cilengaano ca Leza kacitonkomene, na Angelo, katondeka kutozya kunyiika, aku mwaambilia eco cakali kuyo citika. Elyo Musa muniini wakazyalwa. Elyo teeба kayoowa milazyo ya mwaami na kukonga. Ba kalizi kuti Leza waka bikkide janza Lyakwe ali Musa, nkabela eco cakacibamba. Mbo mbubo. Takukwe makani eco mwaami ncakaamba, eco inyika ya tunzenyu ncoya kaamba, eco cili conse cimbi nco cakaamba, ba kalizi kuti Leza wakabikkide janza Lyakwe ali Musa. Aboobo teeба kayoowa ku mulekela, kuba mpoonya akati ka ntale; cindi zyonse nizya kaneneya kulya bana baniini ba Bahebrayo, oko nkuba kabasanizya ku ntale. Elyo nekubaboobo Musa waka bikkwa moonya mu kaato kaniini akutontelwa akati ka ntale, mpoonya akati kazyo. Nkaambo, teeба kayoowa cintu, ba kalizi kuti Leza waka bikkide janza Lyakwe ali Musa.

⁶⁴ Ee, ono, ikuti na twa konzya buyo kuziba cintu nciconya, eco Musololi wesu mupati, Muuya Uusalala, kuti Leza waka Mu tuma, elyo Walo Musololi wesu, alimwi takukwe makani eco inyika nco yaamba, a mbo bamuseka aku mufubaazya, tu tobela Musololi wesu! Leza wakatuma Muuya Uusalala kukuba Musololi wesu. Mwabona? “Ii kaindi kaniini nkabela inyika tiika Ndi boni limbi. Nekubaboobo nywebo muno Ndi bona, nkambo Ndi yooba andinywe, nekuba muli ndinywe, kusika ku mamanino aa nyika.” Aboobo, Musololi wesu mupati ula ndiswe, Muuya Uusalala. Lino tweelede kumutobela oyu Musololi akucita buyo mbubonya Mbwa amba kucita. Elyo oyu Musololi taka tugwisyi kuzwa mu kazila, Uyo tubamba moonya mu kazila ka Lugwalo ciindi conse. Pele Ta kaunki

ku lubazu *lomwe* kuccilila cintucimwi, alimwi lubazu *olu* kuccilila cintucimwi. Uya kukkanala ncobeni cakutonkomana mu mugwagwa wa Magwalo.

⁶⁵ Elyo Musa wa kajisi nzila njia keelede kutola Israyeli, a kutobelwa mpawo nkoonya kulanduka Lwizi Lusalala, nkoonya kuzabuka Jordano, moonya mu nyika ya cisyomezyo, kwiinda moonya mu nkanda. Ta kali Musa wakazwa mu nzila. Ta kali Leza wakazwa mu nzila. Bakali bantu bakazwa mu nzila, abo baleta penzi. Aboobo, atu yeeye zintu ezi ono. (Mundi jatile.)

⁶⁶ Musa, musololi waka nanikidwe. Kumalekelo, cindi na taka tondezya ku bantu, ku zitondezyo a zigambyo, kuti Leza alikke ngu wakali kukonzya kucita, wa kabeleka ezi zitondezyo a zigambyo kumbele lya baalu ba Israyeli, a kumbele lya Israyeli, kusikila niba kakkutila kuti oyu Musa wakali umwi waka nanikidwe wa keelede kubagwisya kuzwa mu cisi eci, kuya ku nyika eyo mboto njoba kasyomezegwa. Mpawo cindi niba kabona zintu ezi zipati Musa nzya kacita mu zina lya Leza, bakali libambilide kumu tobela. Elyo wa kabagusya, waka basololela mu Lwizi Lusalala, bakazabuka, akali a nyika njumu, a mu lweendo lwa mu nkanda, olo lwaamba ciindi ca kusolekwa.

⁶⁷ Cindi muntu atambula Kristo mbuli Mufutuli wakwe, zintuzyonse zili atala lya ng'anda. Pele, oyu muntu katana boola mu lubbizyo lwa Muuya Uusalala; oyu muntu, weelede kuba nzila ya kusalazigwa lutaanzi. We elede kuba aciindi ca kusolekwa mu buumi bwakwe. Nyoonse mwa kali kujisi. Wa kajisi eci ciindi ca kusolekwa. "Onse mwana uboola kuli Leza, lutaanzi ula kwabbawluwa, kuubausigwa, kukomwa. Elyo ikuti na ta tukonzyi kwiimina kukomwa, mpawo citondezya kuti tatuli bana ba Leza; tuli bamusokwe, a kutali bana ba Leza," Bbaibbele lya kaamba. Pele ikuti na twa konzya kwiimina kukomwa, mu kuziba kuti "zyonse zintu zila beleka antomwe ku bubotu kuli baabo bayanda Leza," mpawo tuli bana balombe abasimbi iba Leza, mpawo Ula tunamatila kubelesya Muuya Uusalala kusikila ku buzuba bwa lununuko lwesu. Mwabona, oko nkukomwa, kupengana, cintu mo twiinda.

Elyo Israyeli, mbuli cikozyano cakaindi, yaka cita kubweza oku kukomwa.

⁶⁸ Lino, cindi niba kali kumusanza mu Egepita, nkabela Leza wakatuma Musa. Elyo wa katandabika musako, nkabela intabwa a njina zyakasika aa busena. Wa katandabika kutozya ku zuba, nkabela lya kabbila. Wa kautandabika ku meenda, nkabela aka sanduka kuba bulowa. Baa, Israyeli yakali mutala muli ya Kenani...mutala mu—mu Gosheni, kai jisi buyo ciindi cabulemu; zuba tiilya kabbila, zipenyo tii zyaa bauma; baa, bakali kuba aciindi cibotu ncobeni!

⁶⁹ Mbubonya buyo mbo kacita cindi noka saanguna kufutulwa. Zintuzyonse, bayuni bakaimba bwandeene, alimwi muntu onse

wakali kabotu loko. Elyo, oh, ma, obo zintuzyonse mbo zyakali zibotu loko cindi noka saanguna kufutulwa! Mpawo kwakasika ciindi cakusunkwa, kukomwa, ciindi cakusalazigwa, kulisalazya lwako kuzwa ku zintu zya inyika, “kubikka zintu zitucelezya azibi zitulamatila.” Yebo, omwaalumi, wakaleka kufweba kwako, kaleka kunywa kwako, kaleka kuunka ku puu ruumu, a maparti ako a masiku akuumma njuka. Zyonse zintu ezyo, wa kacita kulisalazya lwako kuzwa kuli nzizyo, ku lusyomo mu Bulowa bwa Jesu Kristo. Kulisalazya lwako! Nobanakazi mwakacita kulekela masusu anu kulampa, akulampya madresi anu, akulilemeka bwandeene kwinda mbo mwakabede. Ciindi cakulisalazya! Ziindi zinji bakali kupapila a kubweeda; ee, oyo tali mwana wa Leza, mwabona. Ii mwana wa Leza ulanga kutozya ku Kalivari, akuziba kuti nkwa kububotu bwakwe.

⁷⁰ Abooobo mpawo eyo nzila ya ciindi, mpaawo akasika kuwa kupati, mu Israyeli. Eelyo eci ciindi cipati cakusyanikila, mpawo bantu batalika kuwa, kuzwa ku lubazu lomwe kuya kuli lumbi. Mpawo mu kung’untauka kwabo, “Ee, ni twa kajokela kumusanza mu Egepita. Myuuya yesu isukamina eci cinkwa cipepelefwa.” Mu majwi ambi, ikuti na Nda cibweza munzila ya kale ono, eco ncoba kaamba.

⁷¹ Lino mu buzuba bwasunu, inga caba, “Oh, masiku onse muli Bwatatu, muswaangano wa mupailo! Cifumo conse Munsono, kujoka ku mbungano! Ino tu mvwa nzi? I cintu nciconya; mukambausi kaimikila a kukambauka; inyimbo; kuya bujoka.” Wabona, mpawo uya bweenda buyo mbuli bulizi bwa mulimo. Toli mukombi pe. Ii mukombi ulainka kuyo komba, kulinondezya mwini kumbele lyu Leza wakwe, a kulumbaizya Leza nkambo ka bubotu Bwakwe; ku Ijwi lyonse, ula jatilila kuli Ndilyo.

⁷² Mbuli buyo makani aluyando. Ikuti na wakali kweenda a musimbi nkaambo wakazi buyo kuti bwakali bulizi, na wakali kweenda a musankwa, cindi nokali muniini. “Baama bayanda kuti nkeenda a mulombwana oyu, pele Nse konzyi ku mukonzya.” To jani cintu kuzwa muli nguwe kuboola kukubona. Na, ikuti na ni nzila njionya kujatikizya musimbi ku musankwa, na musankwa ku musimbi. Wa enda anguwe, ula kucima; baama bayanda kuti koenda anguwe nkaambo walo musyobo wa musimbi oyo baama ngo bayanda. Mwabona, cila kucima; taakwe makani aluyandano. Pele tokwe makani, to yandi kusalazya, to yandi kwiinka kuyo mubona. Elyo cili...Baa, cintu ciyoosya. Elyo cindi naboola kukubona, ma, ulombozya kuti na bindaana, kuya ku muunzi.

⁷³ Eyo nje nzila njionya mboibede cindi wa, “Nkaambonzi nea kambaukila ciindi cilamfu? Ino kujatikizya ezi zyonse zintu, a zintuzyonse?” Wabona, toli mu luyando.

⁷⁴ Pele cindi wajatilila ncobeni ku Ijwi lyonse, mbuli Muuya mbowa mupa kucenjezegwa cifumo ecino, mwabona, “Kujatilila

ku Ijwi lyonse.” Kwayanda eco cali cintu Ncali kukanana kuli ndinywe. Kujatilila! Bwalo Mbuumi Butamani, Ijwi lyonse lya Leza. Lwalo ndutangalo kuya ku mbungano, kensi lya ciimo cili conse. Naa kulapya, kutontola, kuta botelezyi, naa bantu bakali kukwankwana, kuvulukuta kunyema, kufumbwa eco ncoba cita, lucili lutangalo kumvwa Ijwi lya Mwami. Mpawo uli mu luyando antomwe a Kristo, wabona, ula botelwa kuya ku mbungano.

⁷⁵ “Ee, oyandwa, nceeci cifumo alubo ca Munsono, Ndi yeeyela kuti tweede kusanzya bana akuselemukila okuya. Ma, cila cima!” Mwabona, toli mu luyando.

⁷⁶ Pele ikuti na uli mu luyando nconzyo, to konzyi buya akulindila mane caboola cifumo ca Munsono, weelede buyo kuunka kunselelo okuya a mbabo. Elyo tula jana, a kuzwa... I bantu ba Leza, taba kucimi. Baa, balo—balo mbakwesu a bacizi. Mboli Mbwe kali kwaamba kuti, “Na ujisi molasesi wa sogamu mulemu aa cifumo citontola.” Ta—ta weendi, ukkala buyo antoomwe, nywebo mulizi, kujatana canguzu. Lino, obo mbwaambe bucisa, pele bu—bwa—bu sola kumuzibya Nce pandulula, nywebo mwabona. Mula jatana antoomwe. Elyo mbo kwiindila kutontola, balaindila kujatana. Eyo nje nzila mbo yeelede kuba andiswe. I kwaindila kutontola...

Cindi beenzuma bamu nyika bandisiya,
Nekubaboobo kuswena loko kuli Nguwe
kujatilila.

⁷⁷ Elyo nco tuyanda, umwi aumwi, takali kaambo kakuti tuli balemu; pele ngu Kristo muli umwi aumbi, ngo tu yanda, nywebo mwabona. Ngu Leza uli mu buntu bwesu, ngo tu yanda. Lino tula yanda kuboola antomwe. Twa kali kunga tulaimba cimbo cakaindi:

Kalelekwa kaanzyo ako kaswaanganya
Myoyo yesu mu luyando lwa Bunakristo;
I luswaanano lwa mizeezo iikozyenye
Luli mbuli lwa Kujulu olo. (Mwabona?)

I luswaanano lwa mizeezo ikozyenye
Ili mbuli olo lwa Kujulu.

Kumbele lya Cuuno ca Taata wesu,
Tula tila mipailo yesu ya kuyandisisya;
Kuyoowa kwesu, bulangizi bwesu, makanze
esu ngamwi,
Kugwasigwa kwesu a kubambwa kwesu.

⁷⁸ Mwabona? Iiyi, munene! Cindi umwi anojisi cilongezyo, tonse tula kkomana kujatikizya ncico. Cindi umwi ausa, tula usa anguwe. Tu—tu yanda kuba antoomwe toonse. Lino eyo nje nzila mbo tweede kuba.

⁷⁹ Alimwi eyo nje nzila Israyeli mboya keelede kuba. Pele wakaba mukuli, “Oh, eci cinkwa cakaindi cipepelefwa!” cinkwa

ca Baangelo, "Ee, ino tubikkila nzi maanu ku cinkwa eci cakaindi cipepelefwa? Myuuya yesu isukamina zintu ezyi! Elyo zintuzyonse zili lubide. Elyo—elyo mana aya akaindi alawa masiku onse, baa, inga twa sala kuba a galiki a liiki yamu Egepita." Nywebo mwabona, myoyo yabo tiiya kalibambilide ku musinzo.

⁸⁰ Elyo cindi mwaalumi na mwanakazi atalika kutongauka makani aakuya ku cikombelo, bala katala maningi kuya ku cikombelo, taba libambilide mu musinzo. Mbo mbubo. Kuli cintucimwi cilubide abusenabumwi.

⁸¹ Oh, cindi wamuyanda Leza, akuyeeya kuti uya ku Julu, elyo nyoonse nywebo mwiinka antoomwe:

Ino nduswaanano, ino ndutangalo lwa Buleza,
Kuyaama ku kuboko kuteeli;
Oh, ino nduumuno lulelelkedwe a Mwami
wangu munsi loko,
Kuyaama ku kuboko Kwakwe kuteeli.

Ino ii... Tula ziimba ziimbo ezyo.

Tula abana mapenzi esu bweelene,
Tula yumuna mikuli yesu bweelene;
Elyo kanji ku kunka kwa umwi aumwi
Ii misozi ya lweetelelo.

Cindi twa andaana,
Kula tupa kucisa kwa mukati;
Pele tu cino swaangene mu moyo,
Elyo kulangila kuyo swaangana alubo ku
ciindi citobela ca muswaangano wa mipailo.
(Iiyi, munene, tu ciswaangene mu moyo!)

⁸² Lino myua bulibambila ku musinzo, mwabona, muli libambilide kuya mu Nyika ya cisyomezyo. I ziindi zya kusolekwa, mboobo busena bwa ntenda; nkanda, ziindi zya kusolekwa.

⁸³ Israyeli, mu ciindi cakwe cakusolekwa, ya kazwangana a kukwankwana umwi aumwi, a kusukamina cinkwa. Elyo bakali kuyanda kujoka ku Egepita.

⁸⁴ Elyo mpawo baka talika kutongauka kujatikizya musololi wabo. Oh, bakali yoowede kuti wa kali kubasololela ku kusweeka; naaka mana kulitondezya mwini kuba musololi, nkabela Leza waka tondezya kuti wa kali musololi. "Ee, ndiza twa kalilemeka aniini ca kwiindilizya. Elyo—elyo ndiza twa kaleya, toonse mu nzila itali njijo," na, cintucimwi mbuli eco, mwabona, bakali ku ng'untauka kuli Leza a kulwisya Musa, Leza a Musololi Wakwe.

⁸⁵ Lino cindi twa sika ku busena, kwaamba kuti, "Ta ndizi naa Ijwi lyaamba Ceeći, na pe," nkabela, "Ta ndizi kujatikizya Muuya Uusalala; Ndila zumbauzya aniini zya Nguwo. Ndi lizyi

kuti bamwi taba citi.” Ee, amuzumanane kuya ku Egepita. Mwabona?

⁸⁶ Pele ikuti na uli kanzide ncobeni kukkala mu lweendo, kkala ncobeni a Musololi oyu, Muuya Uusalala, kkala ncobeni a Ijwi. Elyo ikuti na wakkala a Muuya, Uyo kubamba mu Ijwi. Mbo mbubo. Uyo kutola nkoonya kuselemukila mu munkali, kazila ka Ijwi. Alimwi uta yoowi kujatikizya Nguwo. Tau kacisi cintu, Uyo kugwasya ikuti na wali cisa. Uyo ponya kucisa koonse, Muuya Uusalala uyocita.

⁸⁷ Lino tu jana kuti, mu mugwagwa oyu, niba kamana kuba boobu, ba kasika ku busena bwa Horebu. Elyo H-o-r-e-b-u, Horebu, mpawo tu jana... Atuli pasaule zina elyo. Oko nkonkuko i—i zina *Horebu* lyambda “busena buyumu” na “lukula.”

⁸⁸ Elyo cindi twa zwa mu luswaanano kuli umwi aumwi mu mbungano, a kuzwa mu luswaanano lwa Muuya Uusalala, kula tuleta ku busena buyumu, lukula, taakwe cipona, zintuzyonse zijisi nsoke ali nzizyo. Mwabona, ii—ii lukula, kabeela kaniini ka kkakitasi kajisi ezyo nsoke ali njijo. Sena mwa kalizi eco kuti niinzi? Eelyo ndi tuvvu liniini liyandisi itete lita jisi maanzi, lila lipeta buyo lini cakujata kusikila lyaba nsoke. Elyo cindi wabona muntuumwi mbuli boobo, ndiza muntu muyandisi wakali kukonzya kutilailwa kabotu, nakaba tuvvu liniini itete na cintucimwi. Pele mucibaka ca booboo, lyaka lipeta lini kusikila lyakaba nsoke, kalyuuma buyo a cintu cili conse, nywebo mulizi, kujana tumpenda. Cintu cilikké nco liyandikana maanzi. Kwa mana. Iya ndikana buyo ii—ii lubukulusyo, na kunyanyamukwa, kukatulusigwa kuzwa ku Mwami. Liyo—liyo livungulula lini aniini, ikuti na uka libikke ku maanzi.

⁸⁹ Pele, oko nkonkuko abo bakkala mu busena obo nko beeledé kupenga a ziindi zya busena obo. Elyo abo bayanda kupona mu musyobo oyo wa bube, oko zintuzyonse nko zyuma a kukwankwana, a kuzwangana a kunyema mbuli obo, ee, uyopona buyo kunsilya bube obo, kwa mana. Pele ta tweeledé kupona okuya, ta kuyandikani kuli ndiswe kukkala okuya.

⁹⁰ Lino, eyi Horebu bwakali busena oko Leza nkwa katyompwa ku bantu, nkaambo baka tuntulikila mu busena obu akunjila mu ciimo eci. Elyo Wa kabaleta kuzunguluka nkoonya kuli mbubo, nkaambo tiiba kakonzya kweendela mu kazila. Ba kazwa i—i mu mugwagwa mupati, bakazwa akuba a mugwagwa wa lubazu olu. Elyo mpawo caka citya Leza kucita cintucimwi eco cakali kuyoosya kapati. Wa...Kacitya Leza kulekela Musa kubweza musako wa lubeta oyo ngwa kabetesya cisi, a kuuma Mwaala, kuti uzwe maanzi.

⁹¹ Lino, nceeco ciiyo cibotu awa ikuti na twa konzya buyo kucijata awa, mwabona. Elyo nkaambo twa kazwa loko mu bweende, akwaangwa ku inyika, a zintu, caka citya Leza

kubweza imbeta zya inyika akuumma Mwana Wakwe Mwini anzizyo, ku Kalivari, kutegwa twa angulule. Sena mwa cibona Nce pandulula?

⁹² Lino, kutegwa ajanine aba bantu maanzi, niba kasika okuya, obu busena buyumu bwaka bambwa kuba Kalivari. Elyo awo Leza wakaambila Musa, Wa kati, “Bweza musako a baalu, azimwi, nkabela Njo imikila aa Mwaala kumbele lyanu.” Alimwi oyu Mwaala wakali Kristo. Elyo Musa, a musako ngwa kabelesya kuleta lubeta aa cisi ca Israyeli, wakabweza oyu musako nguonya a kuuma imbeta zya Leza aa Mwaala. Mwabona? Wa kabweza zibi zya bantu kuba a musako oyu. Kwalo, wa keelede kuuma bantu. Mubusena bwa kuuma bantu, wa kauma Mwaala. Elyo Mwaala, kwinda ku mulimo wa Leza, wakaleta lufutuko, wakaleta maanzi ku bantu bakali kufwa. Wa kaleta buumi ku bantu bakali kufwa. Elyo nce ncico Leza nca kacita ku kasamu Kakwe—Kakwe ka musako wa lubeta, a kuzambaila zibi zyangu a zibi zyanu ku musako oyu; kakuli wa keelede kuuma ndiswe, pele wa kauma Kristo; cuti kuzwa kuli Nguwe kuboole *meenda* ayo aamba “Muuya,” Muuya Uusalala kuboola kuzwa kuli Nguwe, ku kutupa Buumi. Lino tu jisi Buumi Butamani. Lino, oyo Mwaala wakali Kristo. Lino tu yanda kulangisyia.

⁹³ Nda kabona kudulowing’wa kunji kwa bupampu kujatikizya Mwaala oyu. Nda kabona kumwi kuyandisi, kutali kaindi maningi, kusikila awo akali ii–ii mwaala munii waka bikkidwe atala lya cilundu. Elyo—elyo Musa wa keelede kuuma mwaala oyu, nkabela Israyeli yakali kunselelo omuya kajisi nkaku ya tii, kaba bajanina cakunywa kuzwa ku kusansailwa kuniini oko kwakaloka kuzwa ku mwaala oyu. Lino oyo muyeeyo buyo wa muntuumwi.

⁹⁴ Pele cindi oyu Mwaala niwa kaleta meenda Awo, kwakali bantu bainda ku mamilioni obile, kunze lya ng’ombe, nkamele, a zintuzyonse zimbi zyaka nywida mu migolo ya maanzi kaazwa kuli Nguwo. Kakali kalonga kakali kupoomoka kakayutuka alya!

⁹⁵ Eyo nje nzila njoba sola kubamba Kristo, Muuya Uusalala sunu. “Nku sansailwa buyo kuniini.” Mwabona, kunji buyo kukubamba kusyoma cuti nkwalii Leza. Peepe.

⁹⁶ Nkuvula kwa Maanzi! Davida wakati, “Nkomeki yangu yafusuka!” Nku poomoka buyo kwa Muuya Uusalala.

⁹⁷ Bantu bala Uyoowa. Bantu bamwi balati, “Ee, Nda yoowa aniini ulabona Nka cite *ceeci* na *eco*, na ikuti Nda citika kusakana aniini. Nda konzya kumu tondezya umwi wakaindilila aniini.” Pele tamu tondeki kuli umwi ulya cuti muta unki maningi. Mwabona? Iiyi, ino kujatikizya bamwi bata kaunka maningi?

⁹⁸ Lino, twa kali jisi bantu baka njila munyama, a kuzwa kuya munzila italuzi. Elyo—elyo kutali Leza, pele bantu

baka... Nkaambo kakubula busolozi bubotu, azimwi, kwaka baleesya kuya munzila italuzi, nkabela baka njila muciimo cakwiindilizya. Elyo mpawo inyika yonse, dyabulosi utondeka kuli mbabo, "Mwa cibona eco! Mwa cibona eco!"

⁹⁹ Ee, andi mikile cifumo eci a kutondeka kusule kuli baaba bali makumi ali mamilioni taimuzi abanji bata kasola kutalika. Ino kujatikizya mbabo? Mwabona, amulange ciimo cabu. Amulange mulombwana mbuli Eichmann sunu, a zyaatala maningi... Ba lati, "Ba Pentekoste tabalilemeki kabotu alimwi bala nciki kubuleya, alimwi taba yiide," a zimwi mbuli ezyo. Amulange Eichmann, umwi wa bantu baka yiide maningi mu inyika. Elyo wa kajaya, bana bali mamilioni ali makumi ali cisambomwe a banakazi a baalumi, bantu bali mamilioni ali makumi ali cisambomwe. Tamu yandi kutondeka ku muntuumwi mbuli oyo.

¹⁰⁰ Pele mulombwana umwi watakali kukonzya kubala, nokuceya, ndiza wakaita zina lya Bbaibbele buteensi, alimwi, na ndiza kaamba cintucimwi na wakacita cintucimwi cakalubide, na kucita bulubizi bumwi, mitende iyanda kucilemba konse, a kuti, "Tabali ba kusyoma."

¹⁰¹ Mpawo ikuti na ta cikonzyi kusyomwa, nkaambonzi kutali lwiiyo, zintu a bapampu mbo bajisi sunu? Amulange Adolf Hitler. Amulange basongo ba inyika sunu. Amu balange. I kaambyo kakaindi, "Inca zumizigwa umwi kucita aumbi azumizigwe nciconya."

¹⁰² I cintu ncoelede kucita nkukonzya, kwinda ku Muuya Uusalala, kupambula eco ciluleme a cilubide, akubweza eco ciluleme a cilubide.

¹⁰³ Lino, tu jana kuti eyi Kalivari njoba kajisi, nkabela meenda a buumi akapoomokela bantu.

¹⁰⁴ Lino, bantu bamwi bali jisi ku myoyo a mizeeo yabo, kuti boonse ba Israyeli bakanywa, elyo mpawo baka yaamika nkamele a kwaanga ntunda zyazyo ku mbizi zyabo, azimwi, a kubweza bana babo a kweenda kuya kubusena bumwi bumbi, a kusiya Mwaala okuya, kabasansaila. Eco ta ciluzi.

¹⁰⁵ Oyo Mwaala waka batobela, alimwi ayo maanzi akaba tobela. Lino mu Bakorinto Bataanzi, chipati ca 10, Nda syoma, a kampango ka 11, inga twa cijana, kuteeti, "Oyo Mwaala wakatobela Israyeli." Kufumbwa nkoba kaunka kuzwida buzuba obo, Mwaala wakeenda ambabo, nkabela meenda akaba tobela.

¹⁰⁶ I cikozyanyo cibotu, alimwi ii—ii kujatilila kubotu a nkansi ya musyomi sunu, oyo uzi kuti oyo wakali Mwaala wakaumwa lumwi, ayo Maanzi akatilwa lumwi kuzwa ku Kalivari, alaunka antomwe andiswe kufumbwa nko tubede! Oh, ma! Takuli kujoka ku busena bumwi, a kuti, "Ee, twa kajana Maanzi zona, kutala okuya." Tuli jisi Maanzi sunu, mpoonya awa, nkaambo kakuti

Mwaala wakali Kristo! Alimwi Kristo ngu mbobuca nguwenya, sunu, amuya myaaka.

¹⁰⁷ Mwabona, oyo Mwaala waka tobela Israyeli. Teeba katobela Mwaala pe, pele Mwaala waka batobela. Ameni. Israyeli ya keenda mu musinzo wayo. Ba kajisi biyo cintu comwe cakucita, eco ncaku, kutonkomeka nzila, cigaminina moonya mu nyika ya cisyomezyo. Elyo Mwaala a maanzi zyaka batobela.

... i *Mwaala kauba tobela:*...

Bakorinto Bataanzi ba mwaambila booboo, chipati ca 10. Yaa.

... oyo *Mwaala wakali Kristo.*

¹⁰⁸ Leza wakabweza imbeta zya bantu aku zibikka ali Kristo, aku Mu uma. Sena mwakabona, kwakali mpako mu Mwaala, kuzwida awo? I Mwaala waka jisi mpako muli nguwo, awo Musa mpa kauma. Alimwi Kristo waka jisi mpako, cindi Na kaumwa, "Wa kayaswa nkambo ka nsotoko zyesu, nkabela a mibunda Yakwe twa kaponesegwa." Kuza ku Buumi waka poomoka Meenda aa Buumi ayo nge tubotelwa sunu!

¹⁰⁹ Lino, kutegwa kujanwe obu Buumi, amuyeeye, Buumi bwa Kristo bulu kkala a Mbungano. Aleluya! Oh, ikuti twa konzya kusimpa miyeeyo yesu awo kwa maminiti atobela ali kkumi! Kristo tai siyi Mbungano. "Njo oba andinywe lyonse, nokuba ku mamanino aa inyika." Balo mbantu basiya Kristo, kutali Kristo kasiya bantu. I bantu bala Mu siya, kwinda ku kutasyoma kwabo. Bala musiya Kristo, kutali Kristo kasiya bantu.

¹¹⁰ Israyeli ya kasiya kalonga, kutali kalonga kusiya Israyeli. Mwabona? Nkambo, Bbaibbele lilaamba cantangalala cuti, "I Mwaala a maanzi zya katobela Israyeli." Zya kabatobela! Kufumbwa nko bakaunka, Wa kaunka, awalo.

¹¹¹ Oh, Ndi yanda, cifumo eci, ikuti ni twali jisi ciindi, kuvununa ku chipati 1 ca Joshua, awo Mpa kati, "Onse awo ndyato zya maulu anu mpoziya kulyata, Nda apa kuli nduwe. Kufumbwa nkoya kuya, Mwami Leza wako uli anduwe. Uta kayoowi muntu umwi. Koba sicamba! Kufumbwa awo mpoya kulyata ndyato zya matende ako, Ndi nooli anduwe, takukwe makani awo mpobede." Leza kaunka a Joshua!

¹¹² I Leza nguwenya uleenda a Mbungano Yakwe cifumo cino. Atu nywe kuzwa ku Kasensa aka kali kutala. Kufumbwa nkoya kulyata ndyato ya matende, mpaawo Leza mpaya kuba anduwe ncobeni, kunywa mukati aku kupa Buumi. "Njo oba andinywe lyoonse, nokuba kusika kumamanino aa bukkalo." Kristo mbobuca nguwenya, sunu, amuya myaaka. I milao ya Leza.

¹¹³ Lino yebo wati, "Mpa wo, Mukwesu Branham, nkaambonzi ta tuciti zintu mpawo nzyo tweede kucita? Zili buti zipego a zintu mu mbungano tazibooli kulitondezya mbozibede bwini,

oko nko zyeede kuba? Mbobuti mbungano yesu mboi takonzyi kusumpuka ku kasena oko mpo yeedede kuba?" I bantu, mu ciindi ca kusolekwa, yaloka mbuli Israyeli mboya kacita. Ba yeeya kuti Leza waka basiya.

¹¹⁴ Pele, amuyeeye, Mwaala tiwa kasola kusiya Israyeli. Israyeli yakasiya Mwaala, ya kaluba makani aa Mwaala kuuba ambabo ciindi coonse. Wa kali mpoonya alya, kauunka ambabo nconzyo kusika ku mamanino aa musinzo. "Wa kaba tobela." Tii wakali kwaambawida kulaale. Tii wakali kumvwigwa kulaale. Na, tii wakali kubonenwa kulaale.

¹¹⁵ Elyo Kristo awalo taciti! A Mbungano sunu, Ta ambawidi kulaale. Nobamwi mwa kawa, a kucita ezyo zitaluzi, alimwi mwa kasweekelwa lutangalo olo, alimwi Maanzi anu akayuminina. Ucili muku kanana musinzo kuli ndinywe. Ula mutondezya. Walo ulizyi bweende bonse mbo cita a zintuzyonse nzo cita. Walo usukamina ku Mwi itila aa cilao.

¹¹⁶ Alimwi oyu mulimo mupati wa Pentekoste sunu, Leza uli ndila ndinywe ku Mwi itila a cilao. To ambawidi kulaale a Nguwe. Nekubakuti twa lubizya, a kubisya, a ku Mu futatila, alimwi—alimwi kucita zintu nzyo tu teelede kucita, pele nekubabobo Ucili andiswe. Kristo wakati Uya kuba andiswe.

¹¹⁷ I Bbaibbele lyakati, "I meenda kaaba tobela bana ba Israyeli." Cindi niba kafwa nyota, ba kaziba kuti maanzi akali munsi.

¹¹⁸ Lino, ezi zintu zyeendelezegwa aa milao. Boonse bubambe bwa Leza bubambidwe aa milao. Lino tuyu bweza... Atwi imikile aniini.

¹¹⁹ Atu bweze inyika. Ila zunguluka, mu maora onse ali makumi obilo aone kuti ibambe kuzunguluka kumaninide, kulondoka loko, kuti... Tee twaka konzya, a yonse sayaansi yesu, kupanga watchi likonzya kubamba ciindi cilondokede. Lyonse mu ziindi zisyoonto, mawacci mabotu kwinda ngo bakonzya kupanga, mu kweenda kwa mwaka, ayo jana na kasweekelwa maminiti manji. Pele inyika taina konzya kukakilwa pele ili waalya a kavwalu. Ili londokede kapati kusikila bana sayaansi sunu, bana atronomia inga ba mwaambila, mu myaka ili makumi obilo kuzwa lino na myaka ili makumi osanwe kuzwida ono, mbubonya buyo zuba a mweezi kuti ziya kwiindana. Cindi ya zunguluka mubalo mu maora ali makumi obilo aone, alimwi ila zunguluka ciindi cayo kuzunguluka mukondo kwa ciindi, ta iimpyi kweenda. Aleluya! Ili londokede, nkaambo ileenda kweendelana ku mulao wa Leza.

¹²⁰ Ba kalizi ncobeni cindi kufuta akuyosa lwizi kwaunka, kaindi buyo kaniini, nkaambo ba lizi ciindi mweezi noubbila. Elyo Leza weelede kubikka zintuzyonse mu matobelenwa ku mulao. Elyo cindi oyo mweezi wabbila, kufuta akuyosa kwa lwizi kulaunka ankuko. Cindi oyo mweezi wayutuka, mpawo kwasika kuyosa a kufuta kwa lwizi a nkuko. Elyo ba lizi bwini, ku

kulanga ciindi, oyo mweezi wa kubbila. Bala konzya ku cibikka aa kalenda ua almanaki kwa mweezi ambela, a ku mwaambila, ku kamvwalo, cindi oko kufuta akuyosa kwa lwizi kwatalika kuba ansi. Masimpe, nkaambo eyo nje nzila mweezi uya bubbila, nkaambo uli bikkidwe mu matobelanwa aa mulao wa Leza.

¹²¹ Nda kaliimvwi, buzuba bumwi, munsi lya Lake Michigan. Elyo Nda kaunka ku Lake Superior, mu lweendo lwangu kuya ku Canada, eco ciziba cipati ca maanzi. Elyo Nda kaimikila alya, alimwi Nda kayeeya, "Aliongaye mamaile kulanduka bbanda eli pati lya maanzi awa!" Elyo mpawo Ne kamana kuzabuka Mich-... na Lake Superior, Nda kaboola mu Michigan, ciziba ca maanzi citandila kweelana. Elyo okuya, kuzwa ku Lake Superior kuya ku Lake Michigan, kuzwa ku Lake Michigan kusika ku Ontario, alimwi buyo... a Huron, a maziba onse antomwe. Obo mbwaaali mabbilioni taimuzi bbilioni taimuzi bbilioni, a magaloni atabaliki amaanzi mabotu ali mukati ka ziba elyo!

¹²² Lino kutala mu Nevada, a mu Arizona, New Mexico, Eastern California, kuli mamilioni a mayekele afwide nyota maningi, masena apya. Ayo ala munzuka maningi, ikuti ayo maanzi kasalo kuba a masena ayo, eci cisi inga casanina inyika, kakutakwe mutu umwi kafwa nzala, akuba aziindilila zya kusowela mu lwizi. Mbo mbubo! Mamilioni a mayekele anga akomezya mataani taimuzi mamilioni a mataani a magwili a kkabicci, a bunyangu a—a zisyu mani, a radishi a selari, a makowa, a zimwi zimbi. I nyika inga ya zikomezya, yalo—yalo isukamina buyo maanzi.

¹²³ Elyo ngaaya maanzi atala *awa*, alimwi njeeyi nyika ansi *awa*. Lino inga twa cibona, alimwi tu lizi kuti inga cacicita, nkaambo inga twa soleka maanzi akubona na mabotu, akusoleka bulongo a kubona na bujiisi munzuka. Lino, konse kulombozya kuti inga twa cicita, ta tuka zibikki antoomwe. Pele, kuli mulao, alimwi oyo mulao ngwa nguzu zikwela. Lino, ikuti na twa beleka kweendelana ku nguzu zikwela, inga twa tilaila kabeela konse ka nyika, kubweza maanzi kuzwa ku maziba a kwi tilaila. Pele tuyu kuyandika kubeleka kweendelana ku mulao wa nguzu zikwela. Ta tukonzyi ku cilombozya kubusena okuya. Ta tukonzya ku cikwiilila okuba okuya. Ta tukonzyi ku coongolweda kuba okuya. Twe elede kubeleka kweendelana ku milao ya nguzu zikwela, kuti asike okuya. Leza ulabikka zintuzyonse mu mulao.

¹²⁴ Awa, Ndali kuyeeya, Ta ndizi, naa Nda kasola ku mwaambila ceeci, na pe. Nda kali kunselelo mu Kentucky, mu kuvwima basikaale, a Mukwesu Wood, kutandila mwaka wainda. Elyo swebo... Basikaale bakali kubaanga balasyupa kujana, elyo aboobo twa kainka ku ng'anda ya mulombwana, kuyo buzya makani akumvwima. Ii mwaalumi mayekele masyoonto a nyika, elyo a nyika eyi kwakali zisaka zinji. Pele Mukwesu Wood waka ndaambila, kuti, "I mwaalumi muhedeni. Ngu—ngu

sikutasyoma.” Aboobo wa kati wa kali muzyi, aboobo wa . . . na wisi wakali muzyi, wa kali kuunka okuya kuya kulomba na inga twaba a kuzumizigwa kuya ku kumvwima.

¹²⁵ Twa keenzya kutala ku busena bwa balombwana. Elyo walo a mwaalumi umbi, bobilo babo mu maseveinte abo, bakali kkede kunsi lya cisamu ca maapo. Elyo Ba. Wood baka njila mu mwaalumi oyu, elyo wa kati kuli nguwe, “Sa inga Nda vwima aniini mu busena bwako?” Elyo wa kati, “Ee,” wa kati, “kuli kabotu.” Wa kati, “Nduwe Wood uli? Sa uli mwana wa Jim Wood?”

Wa kaamba, “Ndime.”

¹²⁶ Wa kati, “Ee, Jim mudaala wakali kusyomeka abumwi bumbi.” Wa kati, “Inga wavwima kuli konse nko yanda, a busena bwangu. Ndi jisi mayekele *manji boobu* ali myaanda awa, koli gwasya. Koselemuka muli zyoongolola, kufumbwa nko yanda. Kolimvwa buyo kwaangulika omwini.”

¹²⁷ Nda kali kkede mu mootokala, nkaambo Nda kayeeya kuti mukambausi a muhedeni nibata keendelena kabotu antomwe, ikuti na twa kainka kuyo jana luzyalo lwa muhedeni.

¹²⁸ Aboobo mpawo kwiinde kaindi, Mukwesu Wood wakati, “Ee, ono, sa inga Nda aba a mweembeli wangu na? Ndi yeeyela kuti inga kwaba kabotu kuli nguwe kusika antomwe.”

¹²⁹ Elyo oyu mudaala wakanyona a mufunko wakwe, elyo wa kati, “Wood, sena waamba kundaambila kuti waka ubauka loko, kusikila weeblede kuba a mukambausi antomwe anduwe kufumbwa nkoya?”

¹³⁰ Elyo aboobo kuti, Nda kayeeya, kumane eco, ncibotu Nda zwa mu mootokala. Aboobo Nda kazwa mu mootokola, akwaambaula ku mulombwana mudaala maminiti masyoonto. Elyo wa kandi zibya cakufwambaana kuti taka jisi kubelesya kunji kwa bakambausi, nkaambo wa kali kuyeeya kuti twa kali kwaambaula makani acintucimwi nco twa takazyi.

¹³¹ Wa kati, “Ba goloma buyo a cintucimwi eco ncaba takazyi. Ee,” wa kati, “cindi muntu ambaula kuli ndime, Ndi yanda kuti kazyi eco ncaambaula.” Lino, oko nkuyeyea kuli kabotu. Oko nkuyeyea kuli kabotu. Wa kati, “Lino, ikuti na muntu waambaula kuli ndime, Nse yandi kuti kaambaula aa *cintucimwi-cimbi*, kuyeeyelwa kuti tazyi cintu. Ndi yanda kuti wa kanana cintucimwi eco ncazyi nca ambaula.” Ee, Nda kacipa bulemu. Nda kalemeka eco mu mulombwana mudaala.

¹³² Elyo aboobo Nda kati, “Ee, mubwini, oko nkwa muntu onse kuba a muzeezo wakwe.”

¹³³ Elyo wa kati, “Kwakali mukambausi omwe wakasikide okuno mu cisi eci, myaka misyoonto yakainda, waka jisi muswaangano okuya ku Acton.” Elyo wa kati, “Oyu mukambausi, busiku bumwi, mukuba mweenzu mu cisi,

wakaambila ii—ii mulindu waka kkede mu bbunga, ‘Ujisi katambala mu nkomo yako. Alimwi nduwe Muka. *Niini-a-niini*. Alimwi ujisi mucizi uciswa okuya ku cilundu awa. Zina lyakwe ngu *Niini-a-niini*. Uli mukufwa, ku kkulenge lili mwida.’ Elyo wakati, ‘Bweza aka katambala a kuyo kabikka aa mucizi wako, a ku mwaambila kuti, “MBUBOOBU MBWAAMBA I MWAMI, ta kafwi pe, pele kupona.”’¹³⁴

¹³⁴ Wa kati, “Oyu mwanakazi nguwenya wakali mweenzuma wesu.” Elyo wakati, “Twa kamubweza oyu mwanakazi... Aka katambala atala; na oyu mwaalumi, ku muntu.” Kusaanguna wa kati, “Oyu mwanakazi, mukaintu wangu a Ndime twa kali kutala okuya cifumo eco alimwi twa kali tolede, kalindila mwanakazi oyu. Alimwi waa kali mububi kapati! Bamadokotela baka mulanzabuyo meso, ciindi cilamfu cakainda. Waa kali mububi kapati kusikila twa kacita kutola aa mulembo, kumu nyamuna akumu kkazika aa ccemba, aku mujosya. Ku musandula mu mulembo, waa kali mububi kapati.” Wa kati, “Busiku bumwi, kubusena okuya, kwakasika coongo mbuli kuti bakaba a muntuumwi wakafwa.”

¹³⁵ Oyo wakali Ben kubusena okuya, a katambala ao, kakatola kubusena okuya. Ndi syoma kuti wakali nduwe, embo na, Ben? [Mukwesu Ben Bryant wati, “Ameni. Ameni.”—Mul.] Wa kali Mukwesu Ben kubusena okuya, kabweza aka katambala, nkaambo ngu wa katola mwanakazi kubusena okuya.

¹³⁶ Elyo wakati, “I cifumo cakatobela, waa kali kulya pai ikangidwe ijisi maapele.” Elyo akati, “Ta citi biyo milimo yakwe mwini, pele ulacita amilimo ya simukobonyina. Waa kali kabotu loko!” Wa kati, “Lino Nda kalibuzya kanji. Ikuti na Nda sola kubona oyo mukambausi, wa kalizi eco ncakali kwaambaula,” kati, “Ndi—Ndi yanda kuyo ambaula angewe.”

¹³⁷ Mukwesu Wood waka ndilanga, elyo Nda mulanga. Kaliimvwi alya, atombe, a kuzwa nkasaalo, a busofwi, kali kuwila mu zisaka, a—a bulowa bwa basikaale onse ali ndiswe. Elyo aboobo Nda kati, “Ee,” Nda kati, “ngu... Wa amba kuti inga wakonzya kwaambaula ku mulombwana oyu nkabela inga wa kwaambila nzila mbwa kacita ceeco?”

Wa kati, “Iiyi, munene, eco Nce pandulula.”

Nda kati, “Ee, eco—eco ncintu cibotu.”

¹³⁸ Nda kali kulya limwi lya maapo akwe. Manko ayelo akaindi akali kwaalya, nywebo mulizi, mu butololo bwa mwaka, mu Ivvivwi. Aboobo Nda kajisi eli apo liniini, alimwi Nda kali lilide. Elyo Nda kati, “Eelyo ndi apo bbotu loko.” Nda kati, “Nciindi cilamfu buti eci cisamu kacila alya?”

¹³⁹ “Oh,” wa kati, “Nda kacisimpa eco cisamu okuya, myaka yakainda ili makumi otwe na makumi one, na cintucimwi cimbi.”

¹⁴⁰ “Iiyi, munene.” Nda kati, “Ndi yanda buyo kukubuzya mubuzyo.” Nda kati, “Mbobuti mu inyika... Nda abona ayo maapo kaloka kuzwa ku cisamu eco, a matu aco ali mukuloka, alimwi okuno mpa kati biyo kwa Ivvivvi.” Elyo Nda kati, “Tii twa kajisi nokuba kuunga kutontola, tii twa kajisi nociba caanda na cili conse, elyo nekubaboo matu ali mukuloka kuzwa ku cisamu eco. Nkaambonzi cili boobo?”

Wa kati, “I musinza wakasiya cisamu.”

“Oh,” Nda kati, “wa kaunka kuli?”

Wa kati, “Aansi mu miyanda.”

Elyo Nda kati, “Mpawo ula tola ciindi cilamfu buti kunsi omuya?”

Wa kati, “Mane ku butololo.”

¹⁴¹ Elyo Nda kati, “Mpawo uyo jokela atala, a kuleta matu mapya aa cimvule, maapo mapya aakulya.”

Wa kati, “Mbo mbubo. Mbubonya ncobeni.”

¹⁴² Nda kati, “Ee, Ndi yanda kukubuzya cintucimwi, munene. Wa ambaula kujatikizya balombwana abo batazyi nco baambaula.” Nda kati, “Sa inga wandi pandulwida obo Bupampu bupanga oyo musinza uusiya cisamu eco? Ikuti na wakkala mapeyo onse, cisamu inga cafwa. Inga wajaya cisamu. I nseke ya buumi ili mu musinza oyo.” Aboobo Nda kati, “Inga kwajaya cisamu. Ino Mbupampu nzi bubamba musinza oyo kuzwa mu cisamu eco, kuyaansi mu miyanda, akukkala kusikila ciindi cabutololo, elyo mapwo kujoka alubo a kuzyala maapo ambi?” Nda kati, “Tila maanzi mu bbakete akulibikka aa musende, a kubona ikuti, mu Ivvivvi, ayo inka kunsi lya munsende a kujoka mu ciindi cabutololo. Mwabona?” Nda kati, “Kuli mulao umwi, kuli mulao wa bulenge. Bumwi Bupampu bubamba oyu mulao mu matobelanwa. Kutali biyo obo, pele obo Bupampu mbubonya bwheelede kubeleka mulao oyo, bu buselemuna mu miyanda ya cisamu a kujoka.”

Wa kati, “Nse na yeeyede booboo.”

¹⁴³ Nda kati, “Sa inga... Ikuti na wakonzya kusola kujana Bupampu bubamba oyo musinza kuzwa mu mitabi eyo ya cisamu, kuselemukila mu miyanda a kujoka, obo mbo Bupampu mbubonya bwaka ndaambila okuya busiku obo, ‘Koya, kabikke katambala a mwanakazi.’”

Wa kati, “Elyo nduwe mukambausi ulya?”

Nda kati, “Iiyi, munene, mbo mbubo.”

¹⁴⁴ Mwaka wainda Nda kali okuya (wa kafwa), elyo cindi mukamufu wakwe naka kkede mu kkota, kayupa maapo, kuzwa ku cisamu eci nciconya. Mukwesu... Kusaanguna bakali kutu tanda, tiiba kazi kuti twa kalibani. Elyo Nda kaunka aku mwaambila makani aco, kuti twa kajisi kuzumizigwa kuzwa kuli

nguwe. Elyo waka caamba, kati, "Wa kabamba kulyaambilila kuzwide kwa Kristo kataninga kufwa."

¹⁴⁵ Nywebo mwabona, cintu cicita cisamu eco, ino Mbupampu nzi buselemuna oyo? Walo mulao. Walo mulao oyo Leza ngwa kabikka mu ncililano. Alimwi oyo mulao walo mulao wa Leza uya ku mamela cilelwa. Ameni.

¹⁴⁶ Nywebo mulizi, Ta ndikwe makani akunji nkoompolola, a kwaamba—kwaamba ono, "Taliko cita, zuba taliko mweka limbi mainza aya." Liyo mweka, nekuba. Uya kwaamba kunji buti, "Nse—Nse—Nse kalekeli ciindi camasiku kusika." Njo boola, nekuba. Nkaambo eci cintu nco tuponena, citegwa inyika, ceendelezegwa a mulao wa Leza.

¹⁴⁷ Lino, bakwesu a bacizi, Nda yanda kumubuzya cintucimwi. Mpawo, ikuti na twa kazyalululwa ku Muuya wa Leza... Leza takwe zibela ziniini zikompeme a zibela ziyumu, Ngu Leza cakumaninina! Elyo ikuti wa kajisi kunji kwa Leza muli nduwe, mane Wa kali buyo kutandila kuba cimvule, ezyo ni nguzu zikubwene zyakupanga nyika mpya. Ezyo ni nguzu zikubwene kupanga mweezi mupya a bubambe bupya. Ngu Leza, alimwi nciyumu! Elyo ndyoonya eno aumwi musyobo omuno ujisi Buumi Butamani, buli ngo, Muuya wa Leza muli nduwe; Nguzu zikubwene ziya kubusya bafu, ziya kuponya baciswa ziya kubamba mikondo mu ziimo. Pele nywebo, yeendelezegwa a mulao, oyo Muuya uli muli ndinywe. Muli bana basankwa abasimbi iba Leza. Oyo nguwenya Muuya ngo jisi muli nduwe, uyo kubusya lwako ku buzuba bwa bubuke.

¹⁴⁸ Jesu, cindi Na kali ano a nyika, cindi Na kafwa, buntu bwakwe bwaka selemukila mu Gehena, "Elyo waka kambaukilila myuuya yakali mu ntolongo, myuuya mu ntolongo, eyo yata keempwa mu kukkazikamoyo kwa mazuba a Nowa." Mubili wakwe wakainka mu cuumbwe. Pele Ka taninga kufwa, Wa kaaba Muuya Wakwe mu maanza a Leza. Muuya Wakwe wakainka kuli Leza; buntu Bwakwe bwaka inka mu Gehena; a mibili Wakwe waka unka ku cuumbwe. Elyo Jesu waka sinkilwa kuzwa ku bubuke kusikila Lugwalo nilwa kakonzya kuzulizigwa. Ta kakonzya kujoka, nkaambo Wa kakkala mu cuumbwe kwa mazuba a masiku otatwe. Pele cindi Lugwalo lonse nilwa kazulila, oyu mungwala waka gusigwa; Muuya Wakwe waka selemukila ku buntu Bwakwe, buntu Bwakwe ku mibili Wakwe, nkabela Wa kabuka alubo.

¹⁴⁹ Elyo cindi twafwa, buntu bwesu buya kuunka kunsi lya cipaililo ca Leza; oko Nkwe kajisi coolwe ca kubona, mafumo masyoonto akainda, mbuli mbo muzi, mu cilengaano, oko Bbaibbele nkoli kanana kuti, "Myuuya yesu iya kuunka kuli Leza Oyo wa kaipa, alimwi mibili yesu iya kubweeda ku bulongo bwa nyika." Pele buzuba bumwi, cindi Lugwalo lwaaz kuzulila, myuuya yesu uyo angululwa kuzwa kuli Leza, iyo bweza buntu,

nkabela buntu kuya ku mubili. Elyo Nguzu ziya kutu busya, zili moonya muli ndiswe ono! Tuli mu masena Aakujuju ono. Eno tuli mu Nguzu zya bubuke.

¹⁵⁰ Ikuti nikwaatali mulao kuli ezyo, bana basankwa abasimbi ba Leza inga bali lengela inyika abusena awa akwiinka kuyo kkala buumi bwakumbali ali njiyo. Uli jisi Nguzu muli nduwe zya kucicita. Ikuti na ujisi cimvule ca Nguzu zya Leza muli nduwe, uli jisi Nguzu zya kucicita. Leza ulijisi nguzuzyonse. Mwabona Nce pandulula? I Nguzu zili muli ndinywe ziyo bamba. Inga mwakonzya kukanana inyika mu kuba a kwiinka kuyo kkala ali njiyo. Aleluya! Mpaawo we.

¹⁵¹ Ezyo ni Nguzu zili mu Mbungano ono, pele zyendelezegwa aa mulao. Elyo oyo mulao tauli wa “kubamba cikama ca milao.” Walo mulao wa lusyomo. Jesu wakati, “Zyonse zintu zila konzeka kuli baabo basyoma.” Elyo ikuti na ula konzya ku cisyoma, kufumbwa Leza mbwaya kusololela buntu bwako kusyoma, eco nci cako. Busena boonse ndyato zya maulu ako mpa konzya kulyata, ku lusyomo, Leza ula cipa kuli nduwe. Amen! Nci cako, ko civuba, ikuti na inga wa jana kki ku mulao oyu wa lusyomo ucijula kuli nduwe. Sa mwabona Nce pandulula? Ezyo Nguzu zyendelezegwa aa... Ikuti na uli mwana wa Leza, uli mwanamusimbi wa Leza, ezyo taziku siyi. Zili a nduwe ciindi conse. Pele, lusyomo lwako kula tantamuka kuli Nzizyo, pele Nko zicili. Aleluya!

¹⁵² Cindi wa futulwa, Leza ukupa lusyomo lwa kubuka kuzwa ku ntimba ya nyika. Lusyomo lwako lula zunda zintu zya inyika. Niinzi lusyomo lwako? Lusyomo lwako mu mucito oyo Leza ngwa kacita muli nduwe, kukubamba kuba mwana wa Leza. Wa leka kubeja kwako, wa leka kubba kakwo, wa leka kunywa kwako, nkaambo lusyomo lwako lula kusumpula atala lyaco. Amen. Ikuti na to ciciti, to jisi lusyomo pe. “Alimwi ku lusyomo waka futulwa, alimwi oko nkwinda ku luzyalo.”

¹⁵³ Mboli lusyomo lwako mboluya kwaangulula, oko nko kuvula kwa Nguzu nzyo konzya kuba azyo, nkaambo muli nduwe mukkala Nguzu zya kulenga Majulu a nyika. Leza ukkala muli ndinywe, nkabela muli bana basankwa abasimbi iba Leza. Amen! Nceeco we. Pele, lwalo ndusyomo lwanu. Jesu wakati, “Mboli ku lusyomo lwako, kube kuli nduwe. Ikuti na ula konzya kusyoma, zintu zyonse zila konzeka. Ncobeni, Nda mwaambila, ikuti na mwaambila dundu eli kuti ‘Ko zyuka,’ akuta zumbauzya, pele kusyoma kuti eco neco waamba!”

¹⁵⁴ Mpawo musyobo nzi wa bantu ngo mweelede kuba, ngo tweelede kuba, kuba a lusyomo muli oyu Kristo mupati unununa oyo uupona muli ndiswe, oyu Mwaala wakaumwa utasiyi Mbungano? “Ndili andiywe lyoonse, nokuba ku mamanino a inyika,” Busyu bwa lyonse bupoomoka bupati bwa lufutuko a Nguzu zyaka tilwa kuzwa ku Kalivari mu Mbungano, Busyu bwa

lyonse ibwa Leza muumi, kukunka kupati, Mwaala wakaumwa oyo weenda andiswe mu lweendo lwesu.

¹⁵⁵ Israyeli yaka sweekelwa lusyomo. Ba kazwa mu kazila. Ba katalika kusukamina mipika ya nyama. Ikuti ni bakakkala a lusyomo, akusyoma kuti Leza wakali kuyo batola ku nyika, ni kwaataba cintu cakalino basinkila. Ba kajulide kale lwizi, ba kaumide zipenzyo ali basinkondo nyina, bakali bambwide basinkondo babo kusule lyabo, alimwi baweenda kale mu nyika, nkabela tiiba kakonzya kuba a lusyomo lwa kuzumanana kuya ku cisyomezyo.

¹⁵⁶ Joshua a Kalebi bakali jisi olo lusyomo! Ba kati, "Tula konzya kwinda kuzinda cili conse cinga casika kumbele lyesu."

¹⁵⁷ Eelyo nde penzi ku mbungano. Inga twaa zunda malwazi onse. Tuli jisi Nguzu muli ndiswe. Tuli bana basankwa abasimbi iba Leza, taakwe cikonzya kwiima kumbele lyesu. Cintu biyo, Walo uyanda kujana muntuumwi uya ku cisyoma, oyo uya kusyoma eco Leza nca kakucitila kale. Kutali kuti *tuya* kuba; tuli kale ono! Alimwi Busyu bupona lyonse ibwa Muuya buli andiswe. Ameni! Mpaawo we.

¹⁵⁸ Eco Nceli kupandulula cindi ne kanana ciiyo cifumo cino, *I Maanzi Aliko Lyonse Aazwa Ku Mwaala*. I Maanzi aliko lyonse aazwa ku Mwaala mpaali mpoonya ano, Maanzi aliko lyonse azwa ku Mwaala oyo wakaumwa ku Kalivari. Cindi oyo Muuya Uusalala niwa kasika kuzwa kuli Nguwe aa Kalivari, wa kajokela ku Mbungano aa Buzuba bwa Pentekoste, kuti nguonya Muuya Uusalala nkouli cifumo eci. Alimwi Wa katupa cisyomezyo!

¹⁵⁹ Ako nkekaambo, kweenda kumbele lya bantu baciswa, cindi Na kandi lailila kutala, Ndila cisyoma; Leza wakaamba boobo! Eyo nje nzila zilengaano mbo zicitika; Leza waka cisyomezya! Leza takonzyi kubeja.

¹⁶⁰ Ko cisyoma! We elede ku cisyoma. Ceelede kuba Cintucimwi alya, kujula oyo sikusowa malabishi, kujula eco cintu caku kulekela muli ncico. Eco nco tu yandikana sunu takuli kukombela Nguzu zinji. Muli jisi Nguzu zikubwene zya kubamba nyika mpya. Cintu nco yandikana ndusyomo lwa kubelesta ezyo Nguzu. Cintu nco yandikana nkwendelezya buumi obo, a kupona buumi bwa bunaleza, cakuti cindi walomba Leza cili conse, nywebo mulizi! Tuli jisi kaanzambwene muli Leza, ka ceeco. Tu lizi, ikuti na twa bamba Milao Yakwe, Ta kasisi cintu cibotu kuzwa kuli ndiswe, ikuti na tweenda a Nguwe. Leza weenda andiswe. Oh, ma!

¹⁶¹ Ba kajisi biyo cintu comwe cakucita. Ba kali jisi biyo cintu comwe cakucita, nkuti, kakkala cigaminina munzila. Taakwe kutuntulika *awa*, a kutuntulika kuzwa *alya*; pele kakkala munzila! I Mbungano ili jisi biyo cintu comwe cakucita, kakkala munzila! Ba kali jisi Musumpululu wa Mulilo, cakuti bakali

jisi, kulibamba munzila kwinda mukutobela oyo Musumpululu wa Mulilo. Oyo nguwa kabasololela. Cintu cabu ncoba kali kukonzya kubona, wakali oyo Musumpululu wa Mulilo. Baka Ubona kuubeleka kwiinda muli Musa, alimwi ba kalizi kuti wa kali musololi.

¹⁶² Sunu tu jisi Ijwi. Tu tobela Ijwi. Elyo tu bona Ijwi kali beleka mu basyomi, alimwi tu lizyi kuti kuli boobo, mpawo. Leza kabeleka a ndiswe, kasimpikizya Ijwi antomwe a zitondezyo kazitobela! Tula kkala a Ijwi. I Ijwi lileta micelo.

¹⁶³ Ba kakkala a Musa. Nkaambo, Musumpululu wa Mulilo, Musa wakatobela Oyo. Alimwi ba katobela. Cindi niba katalika kulwisya Musa, a kung'untaukila Leza a kulwisya Musa, ba katuntulika kuya ku lubazu lomwe a lumbi. Mapenzi akanjila. Masimpe.

¹⁶⁴ Tu kkala a Ijwi, alimwi Ijwi lileta zitondezyo. Jesu wakati, “Ezi zitondezyo ziyo batobela abo basyoma Ijwi.” Mwabona, li kkala a i... Amu kkale a Ijwi, Ijwi lileta zitondezyo. Pele, Musa, ino wa kacita nzi?

¹⁶⁵ Ba katuntulika kuzwa, nkabela ba kacita nzi? Bakatuntulika kuzwa mu kazila, nkabela baka sweekelwa kukunka kwa maanzi.

¹⁶⁶ Ndi yeeya kuti eci nce cintu mbungano ncoya cita asunu. Ya tuntulika kuzwa mu kazila ka Lugwalo. Ba kaleya kuya mu tulengwa. Ba kaleya kuya mu zintu ziniini nzyo bata keelede kucita. Ba kasala zintu. Ba kasala zintu mbuli Kansiyansiya ka Baapostolo. Mpaali mpo mu kajana ako mu Bbaibbele? Ba kasala katikizimu nko babala. Ba kasala tubungwe mu cibaka ca lujano. Ba kasala kusukana maanza mu cibaka ca lujano lwa kuzyalululwa. Ba kasala kusansaila mu cibaka ca lubbizyo lwa maanzi. Ba kasala ciwa cibi, “Taata, Mwana, a Muuya Uusalala,” kakuli taakwe cintu cili boobo mu Bbaibbele. I Bbaibbele lyakati, “Mu Zina lya Jesu Kristo!” Kuli cintu comwe biyo cakucita ikuti na uyanda ayo Maanzi ngaonya, kujokela mu kazila. Amu koje ku i... Tana unka; Ucili waano. Mu bweza tunsiyansiya mu cibaka ca Kristo. Mula tuntulika mu kulilemeka kwa kunyema kubi.

¹⁶⁷ Umwi wati, “Ee, Ndili muna Methodisti.”

I umbi ulati, “Ndili muna Baptisti.”

Eco citondezya kuti toli Munakristo, mpawo. Tu zulilwa kuli Kristo! Tuli Bakwe.

Yebo wati, “Ee, ikuti, mebo, wa Baptisti?”

Ikuti na nku konse nkobede, nkokuti toli wa Kristo, uli wa Baptisti.

Yebo wati, “Ee, Ndili wa Pentekoste.”

Ikuti na uli wa Pentekoste buyo ku kabungwe, nku konse nkobede.

¹⁶⁸ Pele, ikuti na ujisi luzibo lwa pentekoste! Elyo Ijwi ly pentekoste liya kuzyala lujano lwa pentekoste! Amutobele cintu nciconya abo basikwiiya ncoba kacita, kukkala kutala okuya kusikila mwa zuzigwa Muuya Uusalala.

¹⁶⁹ Elyo mpawo ikuti na wa impana ku Ijwi, oyo muuya muli nduwe ulaimpana kuli ceeco Ijwi nco lyaamba, nkokuti tauli Muuya Uusalala. Ngu dyabulosi kali kozyanisya ku Muuya Uusalala. Sa mwabona awo mpo twa kajisi ali ncico? Oh, tobamwi twa kaambaula mu myaabmo, twa kajisi mabibo a koongolola a zintu mbuli ezyo, a kukaka zyonse zintu ezi zimbi. Twa kalekela zintuzyonse zyatakalimu Lugwalo kusika mu mbungano. Mpaali mpo twasika sunu? Twa jokela mu lukula lumbi, kabunga ka kayuminina. Twa kabunganya, a kusweekelwa Maanzi esu. Eco ncencico Pentekoste ncoya kacita. Cindi twa talika kubunganya, italika kumwaya luswaanano, a kwaamba, “Ee, ono tatu kaswaangani antomwe, ikuti na oyu mulombwana usyoma ceeco.”

¹⁷⁰ Koyabuya, kkala anguwe kusikila wa boola ku Ijwi ly Bwini, luzibo lwa Bwini. Kufumbwa mbo cibede, amu cilekela kuba, nekuba. Koyabuya buyo, amube mbuli banabakwabo.

¹⁷¹ Pele, oh, twa kacita kubunganya, akuti, “Ee, nkaambo toli wa Bumwi, nkaambo toli wa Bubili, na Butatu, na mbuli *obu*, tatu kabi a luswaanano a nduwe.” Mpawo cindi twa cita ceeco, ino tu citanzi? Tuli josya nkoonya ku lukula alubo. Mbo mbubo!

¹⁷² Pele, amuyeeye, cindi Israyeli niya katuntulika kuzwa mu kazila, nzila iya ku nyika ya cisyomezyo, Mwaala tiwa kabasiya; Wa kakkala ncobeni alya, mbubonya a maanzi akacita. Mbubonya mboubede Muuya Uusalala, ula kkala mpoonya alya. Ta tweelede kutuntulika kujoka.

¹⁷³ Lino, awa Leza utu yiisia cintu cipati. Leza utu yiisia ciijo awa. Kristo wakaumwa lomwe, katupa lujano lwa pentekoste, ciindi cimwi, kumaninina. Lino, cindi oyo Mwaala niwa kaumwa, Tii wakeelede kuumwa alubo. Wa kaumwa biyo ciindi comwe.

¹⁷⁴ Musa waka lubizya ku Uuma ciindi cabili, kutondezya bukompami bwa lusyomo lwakwe mu Mulungo. Pele cindi Kristo nakaumwa lomwe, tu lizi kuti Ta kayandikani kuumwa alubo. Ee, ino Musa wakali kucita nzi? Musa wakali kubamba cintucimwi cipy, kasola kupanga cintu cipy.

¹⁷⁵ Eyo nje nzila bakambausi besu ncoba cita asunu. Ba sola kubamba cintucimwi cipy. “Tuyo libambilila Assemblisi ya Leza. Tuyo libambilila Mbungano ya Pentekoste iya Leza. Tuyo libambilila General Council. Tuyo libambilila *eci, eco, na cimbi*.” Eco tacili ncico Leza nca kacita. Oyo tee wakali muzeezo Wakwe.

¹⁷⁶ Kristo wakaumwa lomwe. Olo lwakali lujano lutaanzi. Eyo yakali nzila ntaanzi. Aa Buzuba bwa Pentekoste, Petro wakati, “Amusanduke, umwi aumwi wanu, akubbizigwa mu Zina lyu Jesu Kristo.”

¹⁷⁷ “Tula sansaila mu zina lyu ‘Taata, Mwana, Muuya Uusalala,’ kupa misyobo yonse ya tunsiyansiya a zintuzyonse zimbi kujatikizya Nguwo.” Cindi twa leya kuzwa ku Ijwi, ta cigambyi cakuti ta tukonzyi kuya kuli konse. Mwabona?

¹⁷⁸ Leza utu yiisa ciiyo. Musa ta keelede kwaamba kuti, “Lino tula talika cintucimwi cipyia okuno ono, nkabela tuyu bunganya alimwi tuyu bamba mbungano ya Katolika.” Eco ncintu citaanzi ncoba kacita. Peepe, mpawo kwiinde kaindi, “Ee, tuyu talika cintucimwi cipyia cizwa kuli ceeco, tuyu bamba ya Lutherani.” Mpawo kwasika Anglikeni, mpawo Baptisti, a zimwi zimbi, abana Campbelliti, a Mbungano ya Kristo, a sikulwanakristo, a zintu zimbi zyonse. Mwabona, ba katalika kweenda, omwe kutobela umbi, omwe kutobela umbi, kubamba tubungwe a tubunga. Eco tii cakali ncico. Mwabona okuya na cintu ncobali mukucita? Bali mukuuma Mwaala alubo, katalika cintucimwi cimbi. Ta tuyandikani njiisyo mpya.

¹⁷⁹ Onse muntu mu Bbaibbele waka bbizigwa mu Zina lyu Jesu Kristo. Onse muntu mu Bbaibbele waka tambula Muuya Uusalala, kaboola munzila ya Leza, mbubonya nzila Leza nja kacicita kuba. Ba kacita cintu nciconya. Ba kajisi lujano ndulonya. I zitondezyo nyonya zyaka batobela. I milimo njionya yaka batobela. Nkaambonzi? Ba kali kuponena ku Mwaala. Ba katambula Maanzi ngaonya.

¹⁸⁰ Elyo, asunu, kaambo neo tu jisi tunsiyansiya a tubungwe tunji loko, nkaambo tu talika cintucimwi cipyia. Ta tuyandikani cintu cipyia. Amujoke!

¹⁸¹ Musa ta keelede kuuma Mwaala, alubo, kutali cintucimwi cipyia. Wa keelede ku baambilila, zya Mwaala mutaanzi. Oh, Ndi syoma kuti mwacimvwa eco! Musa wa keelede ku kanana ku Mwaala, mutaanzi wakaumwa; kutali kusola ku Uuma alubo, kutali kusola kutalika cintu cipyia, pele ku kanana ku Cintu cakaindi!

¹⁸² Leza, kondi gwasya! Ikuti na Nka fwe nkeli mucete loko, Njo kanana zya Mwaala mutaanzi! Njo kanana zya lujano lutaanzi. Njo kanana zya Magwalo mataanzi ayo akabapa lubbizo lwa Muuya Uusalala, “Amusanduke, umwi a umwi wanu, a kubapatizigwa mu Zina lyu Jesu Kristo kuti mujatilwe zibi, nkabela moyo tambula cipego ca Muuya Uusalala.” I Busyu bwa lyonse ibwa Meenda akuunka kuzwa ku Mwaala acili andiswe. Uyo leta cintu nciconya. Uyo leta zilengaano. Uyo leta kuponesegwa. Uyo leta zisinsimi. Uyo leta cintu conse ncoba kacita.

¹⁸³ Cindi Israyeli niya kalulama mu Magwalo alubo, a kujoka mu mugwagwa, ba kazumanana kuya ku nyika ya cisyomezyo. Pele bakatola myaka ili makumi one.

¹⁸⁴ Pentekoste yatandila kuba a myaka ili makumi one, kutuntulika monse mu nkanda. Amujoke ku Mwaala! Wa bonekela. Mpaawa kuli, lemedianwe mpoonya awa mu Ijwi. I Muuya Uusalala uli waano kaucita cintu nciconya Nca kacita lyonse, mbubonya Busyu bwa lyonse ibwa Maanzi buli waano. Amujoke buyo kuli Nguwo, amujokele kwakaindi, mutaanzi. Wakali buti mu mutaanzi?

¹⁸⁵ “Ee, bakasukana maanza a mukambausi”? Taakwe cintu cili booboo. “Ba kabbizigwa mu zina lya ‘Taata, Mwana, Muuya Uusalala’? Takukwe cintu cili booboo. Taakwe bantu mu Bbaibbele, alionse, na (kunze lya myaka ili myaanda yotatwe) kunze lya Bbaibbele, baka sola kubbizigwa mu Zina lya ‘Taata, Mwana, Muuya Uusalala.’” Ako nkansiyansiya ka Katolika, kutalika njiisyo ya Bbaibbele. Mwabona?

¹⁸⁶ Ba kali jisi Muuya Uusalala. Ezi zitondezyo ziyo batobela abo basyoma. Uyo cicita alubo asunu. Oyo Mwaala ulapona buya lyonse mbuli mbo wakabede lyonse, oyo Mwaala wakaumwa!

¹⁸⁷ Tu taambi kuti, “Ee, ono koboola akusangana mbungano yesu ya Pentekoste, njila mu zilao zyesu zya Pentekoste.” “Peepe, koboola akusangana Baptisti, na Methodisti, na Presbyteria, na Katolika.” Ino ncinzi eco? Oko nkuma Mwaala alimwi, kusola kutalika cintucimwi cipyga.

¹⁸⁸ Baambile, “Amusanduke, aku bbizigwa mu Zina lya Jesu Kristo,” ku kujatilwa zibi zyabo, “nkabela ezi zitondezyo ziyo batobela abo basyoma.” Lino mwa joka mu mugwagwa, kujoka ku Maanzi ngaonya. I Maanzi ngaonya ayoopa kukatulukwa nkukonya. Ayoopa kukwibbaulwa nkukonya ku mubili. Uyoopa nguzu nzyoonya zisalazya. Uyoopa nguzu nzyoonya zyakuponya. Uyo cita cintu nciconya Ncowa kacita kaindi, ikuti na twa joka buyo ku Muuya nguonya.

¹⁸⁹ Buumi mu musaansa wamagirepu uyo zyala magirepu. Ikuti na wakacita mwaka wainda, uyo zyala cintu nciconya uno mwaka. Oyo mulao wa Leza. I mulao wa Leza ngwa kuti, ikuti na oyu musaansa wamagirepu, kousiya ulikke, uyozyala magirepu. Ula konzya kuutintanya mukati a cintucimwi cimbi, pele mpa wo usiye ulikke nkabela uyo jokela ncobeni ku magirepu ngaonya alubo.

¹⁹⁰ Aboobo tula itintanya mbungano mukati abuna Pentekoste, abuna Baptisti, abuna Methodisti, abuna Presbyteria, a—a buna Anglikeni, a musyobo onse umbi wa kalengwa. Nkaambonzi waka isiya ilikke? Kojoka ku Musaansa, uyo joka ku Nguzu nzyoonya. Amen! Amen! Nda ciyanda eco.

¹⁹¹ “Talika cintucimwi cipyga.” Cintu nciconya ncoba cita. Kutali kusola kutondezya bwami bwesu. “Mwiyi Niini-a-niini ngu

sikutalisya mbungano *Niini-a-niini* mpati ya *niini-a-niini-a-niini*.” Tii cakali eco.

¹⁹² Eco ncencico Musa nca kaamba, “Njo batondezya Nee konzya kucita. Njo cileta, nekuba!” Wa ka Uuma, tii wa kasika. Wa kaongolola alubo, “Kutondezya Nee konzya kucita!” Leza waka mubeleka nkambo ka ceeco.

¹⁹³ Tamu konzyi kuyeeya, ikuti na “mwajatilila buyo ku kabungwe kamwi.” Leza uyo kubeleka nkambo ka ceeco. Mbo mbubo ncobeni. Mweelede kujoka ku kutilika oko. Amujoke.

¹⁹⁴ Kokanana buyo ku bantu. (Ta baambili kuti, “Amuboole musangane mbungano yesu. Amuboole mwaambe kansiyansiya kesu.”) “Amujoke a kweempwa, akubbizigwa mu Zina lya Jesu Kristo, kukujatilwa kwa zibi zyanu; nkabela moyo tambula cipego ca Muuya Uusalala, ikuti na myoyo yanu ililuleme. Alimwi ezi zitondezyo ziyo batobela basyomi. Nkamu ya basyomi, ezi zitondezyo ziya kuunka ambabo.” Ku kaambonzi? I Mwaala, Mwaala wakaumwa a Meenda Aakwe aa Buumi ali mukuzwa ncobeni, kuleta cintu nciconya eco Nca kacita kaindi okuya. Ta cikonzyi ku cigwasya. Oh, iifyi.

¹⁹⁵ Tu yanda kutondezya mweebwa, akuti, “Tuli ba Methodisti, a Baptisti.”

¹⁹⁶ Koamba buyo ku Mwaala, Ngo Busyu bwa lyonse. Uta usangani Oyo. Nda kajisi “kuswaanana” kunselelo awa. Muta soli Ku sangana. Tamu konzyi kusangana Eci, eco cintu comwe ncobeni. Inga mwasangana Methodisti, inga mwasangana Baptisti, inga mwasangana ba Pentekoste, inga mwasangana ba Anglikeni, pele tamu konzyi kusangana Eci. Peepe. We elede kuzuzigwa Oyu. Muta sangani Oyo; muzuzigwa buyo a Nguwo. Kwa mana. Ku zwide nzi? Kuzulwa Nguzu, kuzulwa a Muuya, kuzulwa a Buumi, kuzulwa a lutangalo, luumuno, kukkanizikacamba, buuya, bubotu, Nguzu zya Muuya Uusalala mu buumi bwanu, nkambo ka Busyu buteeli nkobuli. Amuyeeye.

Ndila jala nkambo ciindi ciya bumana.

¹⁹⁷ Pele, amuyeeye, oyo Mwaala tii wakaba siya. Tii waka basiya. Alimwi Kristo taka tusiyi pe; Kristo wakati, “Njo oba andinywe lyoonse, nokuba ku mamanino a inyika.” Sa mbo mbubo? Alimwi oyo Mwaala waka kkala ambabo lweendo lonse kuzwa ku Horebu kusika ku Nebo. Wa kacita. Kuselemukila ku Jordano, Walo ucino liko. O Leza, Ndi yanda Ku ubona ku Jordano!

¹⁹⁸ Musa, cindi na kali ku Jordano, Mwaala wakali a nguwe mu lweendo lonse. Elyo wa kалимви alya, kalangide ansi ku ii—ii nkamu ya bantu abo bakawa akutantamuka kuzwa kuli Leza. Moyo wakwe usukamina mbabo. Alimwi wa kalanga mutala lya Jordano. Ngooyo wakali ku Jordano. Jordano, wamuuya, Ngwe kanana. Alimwi ngooyo wakaliimvvi alya, lufu lwakali kusika cakaziizi. Pele wa kalanga, kakkede alya munsi lya lubazu

Iwakwe elyo mpaawo kwa kakkede Mwaala. Wa katanta buyo aa Mwaala, nkabela Baangelo bakasika, aku mutola.

¹⁹⁹ “Nse kamusiya nanka kumu lekelezya.” Takukwe makani obo ziindi mbo ziyuma, obo mbo tucembaala, amusyobo wa lufu ngo tufwida, amuyeeye, Mwaala kuyooba okuya ku Jordano. Tau kazwi na kulekelezya pe. Amuyeeye buyo eco. I Busyu bwa lyonse ibwa Maanzi aazwa ku Mwaala ayooba andiswe muciindi conse ca buumi, alimwi nouba ku Jordano.

²⁰⁰ Atu kotamike mitwe yesu. [Ii mukwesu kuyumya—Mul.]

²⁰¹ Kucindi oyo Muuya noweenda akati kesu, Muuya wa Leza uleenda akati kesu, na kuli baliko abo cifumo eci ano bata muysi Kristo, alimwi tamuli—tamuli munsi ku Mwaala oyo, kutali aa bwambe bwa kukanana kuli Nguwo cifumo cino? Pele mulizi kuti Nko uli. Amulange kuli Nguwo kaubeleka koonse, ku Mu bona keenda koonse, Ku ubona kaweenda atala lya bantu. Obo Mbusyu bwa lyonse ibwa Maanzi. Olo ndufutuko. Oyo ngo Muuya uzuzya inkomeki zyabo ku busena mane taba konzyi kuumuna limbi, cintucimwi ceelede kuyutuka. Alimwi to Mu zyi, uyanda kutambika janza lyako a kuti, “Kondi kombela, Mukwesi Branham. Ndi yanda ku Mu zyiba ono. Alimwi Ndi yanda kwaambaula a Nguwe, alimwi Ndi yanda ku Mu zyiba mbuli buzule bwa Muuya Wakwe. Ndi yanda kuziba kuti Uli nkoonya kumbali lyangu, ciindi coonse. Ndila syoma Mbwa bede. Pele Ndi yanda kuba ku bwaambe bwa kukanana. Elyo Nda fwanyota, alimwi Nda fwanzala ya Leza. Ndi yanda ku Mu zyiba kabotu”?

²⁰² Leza aku longezye, munene. Alimwi Leza aku longezye, munene. Alimwi yebo, mukwesu. Yebo, inzya, kusule kwini. Ansi awa, omulindu, iyi. Iyi, omulindu. Tula abwene maanza ako, alimwi Leza ulaabwene. Leza aku longezye, omwaalumi mukubusyi. Leza aku longezye. A yebo, omulindu. Amen. Leza aku longezye. Ulelekwe yebo, mucizi. Umwi umbi ono, mu ciindi cakubatama. Leza aku longezye, kusule kwini okuya, mulombwana mukubusyi.

²⁰³ Amu buyeeye. Amu buyeeye, Busyu bwa lyonse ibwa Maanzi aazwa ku Mwaala, oyo Muuya nguonya; oyo Wa koompolola okuya ku buzuba bwa lubeta nkambo ka Nguwe, cindi Na kabweza lubeta lwasu. Elyo musako wa Leza wabukali waka Mu uma, nkabela zibi zyanu zyaka vungailwa mu musako oyo, elyo waka Mu uma, alimwi Bulowa Bwakwe a maanza zyaka poomoka kuzwa kuli Nguwe. Wa kati, “Taata, mu maanza Aako Nda upa Muuya Wangu.” Elyo aa Buzuba bwa Pentekoste, Wa kasikila kuunka andiswe mu lweendo. Alimwi Uli munsi loko ono.

²⁰⁴ Sa inga toyanda kwaamba kuti, “Nda katuntulika kulaale kuzwa ku Muunzi, Mwami, Nda boola ku Muunzi”? Kuciindi notwiimba eyi, ikuti na uyanda kuboola atala ku cipaililo

a kubamba kulisalazya alubo, ayebo, ku buntu bwako, kuli Kristo? Ameni.

Nda katuntulika kulaale kuzwa kuli Leza,
(kuleya mu kazila.)

Lino Nda boola ku muunzi;
I kazila ka (Kakutasyoma, nywebo mwabona.)
keenda kwacindi cilamfu,
Mwami, Nda boola ku muunzi.

Boolu ku muunzi, boolu ku muunzi,
Takucikwe kutuntulika limbi;
Ko julisya maboko Ako aa luyando,
Lino, Mwami, Nda boola ku muunzi.

²⁰⁵ [Mukwesu Branham wang'ung'una lwakuti *Mwami*, *Nda Boola ku Muunzi*—Mul.]

²⁰⁶ Basankwa botatwe baniini bazwaa kuyutuka, cakufwambaana loko, misozi mu meso abo, bafugama ansi munsi lya cipaililo. Mubwini, ba jatilwa. Ba jatilwa kabatana akwalo kusiya zyuuno zyabo, cindi mizeeo yabo miniini niya bambwa. Ba boola buyo kumbele akufugama ansi awa, kulekela bantu kuziba kuti, bali ku lubazu lwani, cifumo eci.

²⁰⁷ Inga ndayeyela kuti kuli bamwi bantu batati loko banga bayanda kucita ceeci, bayanda buyo kufugana ansi, akuti, “Mwami, Nda—Nda katuntulika kule kuzwa ku kazila. Nda kajisi kuzumbaunya kunji loko, alimwi ziindizimwi Nda kaingaila kuzwa akunjila mu zibi. Lino Ndi—Ndi yanda kujoka kacitana mana ciindi. Leza, Ndi—Ndi yanda kusika. Inga ndayandisya nconzyo kusika a kufugama ansi.” Ameni.

²⁰⁸ Lino, basimbi botatwe baniini bana Arthur Beam, batandila musela omwe, baboola atala awa, bafugama ansi.

²⁰⁹ Uuboola kunembo musimbi muniini oyo ujisi munyina muniini mupya ku muunzi. I buzuba bumwi Nda kali kkede; Muka. Wood wakasika a kundaambila, kuti oyu mucizi wakali kuya ku cibbadela kuyo zyala muvwanda. I Muuya Uusalala wakati, “Koya kabaambile kuti uyooba musankwa.” Cindi naka zyalwa, wakali musankwa muniini.

²¹⁰ Kuboneka kuba bana cifumo eci, bantu baniini kabazwa ku kkilasi niini ya Mucizi Arnold, kabasalazya maumi abo. I cipaililo coonse, kululyo lwango, cizwide bana baniini.

²¹¹ Inga cabota kuti twa imba ciimbo, cipaililo, kuli bamwi bantu, batati.

Lino, Mwami, Nda boola ku muunzi.

Boolu ku muunzi . . . (. . . ? . . .)

Takucikwe kutuntulika limbi;
Ko julisya maboko Aako aa luyando,
Lino, Mwami, Nda boola ku muunzi.

²¹² Atu kotamike mitwe yesu asyoonto buyo, ku mupailo, wa bantu aba baniini.

²¹³ Taata Wakujulu, ikuti na kuyooba junza, ikuti na Jesu akalindile kusika kwa myaka imbi ili kkumi na kkumi ayosanwe, aba bayooba basankwa a basimbi bayo kubweza oyu Mulumbe antomwe ku mazyalani aaciza. Kwiina kuzumbaauzya mu mizeeo yangu, Mwami, pele mazuba onse a buumi bwabo bayo kuyeeya kuboola atala a cipaililo eci. Elyo balo ni ngale ziniini, Mwami. Myoyo yabo yabwana a buuya yapegwa milandu cifumo cino. Kutali akwalo kumvwa Mulumbe oonse; bazwa calino mu kaanda, kuzwa kukuswiilila Mucizi wesu Arnold kaambaula; kutanda kuzunguluka cipaililo awa, kabapa maumi abo mabombe kuli Nduwe.

²¹⁴ Lino, Taata, Nda zwaa ku kanana kuti muli ndiswe mukkala Muuya Uusalala. Elyo oyu Muuya Uusalala, lusyomo a Muuya oyu, zilacita zintu zyonse. Elyo Ndi syoma kuti ndyoonya oora eli, Wa cilekelela cibi conse ncoba bakacita. Elyo Nda Ku lomba, a lusyomo lonse luli mu moyo wangu, kuti Ubambe baumi abo mabombe kwinda mu lweendo lonse. Akube kuti bata kaleyi kuzwa mu Nzila.

²¹⁵ Eci ncintu ceenzu nconzyo. I Muuya waamba cifumo cino, kuti tula “bona cintucimwi ceenzu.” Leza, ikuti na Wa leka kubeleka abamwi, bweza bana baniini. Obo cifumo cino, ku lwiito lwaku cipaililo, takukwe mupati omwe, pele nkamu yonse ya bana baniini baboola. Nekubaboo, wali Mulumbe mupati wa kumvwisya kuyumu, nokuba ku batapi, pele bana bajata Muuya wa Nguwo. Twa Ku lumba kuli mbabo, Taata. Nda bapa kuli Nduwe, mbuli muzike Wako, mbuli zilumbo zya muswaangano oyu; nkambo, kwiibaluka obo Busyu bwa lyonse ibwa Maanzi a Buumi buya kukunkila kuli mbabo kufumbwa kuti kabapona. Akube kuti babe a lusyomo ono muli ceeco cicitika, kuti Leza oyo wabakwela kuzwa ku zyuuno akuba tumina atala awa, akube kuti babe a lusyomo muli Leza oyu mazuba a buumi bwabo boonse. Akube kuti myuuya yabo mibombe ikaletwe kuli Nduwe mu buzuba bwa lufu lwabo; kujosegwa ku mubili wabo mu buzuba bwa bubuke. Mbi Bako, Taata. Twa bapa kuli Nduwe kwinda mu Zina lyu Jesu.

²¹⁶ Kuciindi notukoteme mitwe yesu. Ndila lomba aba bana bonse bali a cipaililo, abo basyoma kuti Jesu Mufutuli wanu alimwi Oyo Wa mwaambila, kusule okuya mu bbunga, kusika atala awa akufugama ansi kuzunguluka eci cipaililo. Sena mula syoma kuti Jesu ula tuyanda alimwi wajatila zibi zyanu? Ndi yanda kuti nyoonse mwiimikila ku matende anu a kucebukila awa ku bbunga. Eyi, nje nzila njo mukonzya kwaambila bantu kuti mwasyoma kuteeti Jesu wamu futula. Lino amwiimikile ku matende anu, mbo mbubo, akulanga nkonya kusule kutonzya ku bbunga. Nyoonse nobasankwa baniini a basimbi abo bayandisyu

Jesu, amwiimikile akucebuka kutozya ku mbunga okuya, umwi aumwi wanu.

²¹⁷ Ino kujatikizya ndinywe nobasimbi baniini awa kumbele? Sena mula syoma? Sena mula musyoma Jesu? Aba basimbi baniini awa, sena mula muyanda Jesu amoyo wanu onse? Ula cita? Ula Mu yanda? Ula Mu yanda, oyandwa? Koimikila awa, akulekela bantu kuziba kuti ula muyanda Jesu. Leza aku longezye.

²¹⁸ Lino atu nyone ku nzila *eyi* akwiimbila bantu aba katutana kuzwa, “Jesu ula ndiyanda! Eci Ndi lizi, Bbaibbele lindaambila obo.” Mwabona? Atu nyamune buyo maanza esu mujulu mbuli mbo tuyiimba ono. Yaa, atu yiimbe.

Jesu ula ndiyanda!
Eci Ndi lizi,
Nkambo Bbaibbele lindaambila boobo;
Bana baniini bazulilwa kuli Nguwe,
Bali kompeme . . .

²¹⁹ Lino a maanza anu mujulu . . . ? . . . Toonse swebo antoomwe:

Iiyi, Jesu ula ndiyanda,
Iiyi, Jesu ula ndiyanda,
Iiyi, Jesu ula ndiyanda,
Iiyi, Jesu ula ndiyanda,
I Bbaibbele lindaambila boobo.

²²⁰ Lino nyoonse amulolole kutobela ndime: Ndila syoma kuti Jesu Kristo Mwana wa Leza. Sunu, Nda muzumina mbuli Mufutuli wangu wacigaminina. Kuzwa buzuba obuno, katalikila awa kuyabuya, Njo Mu yanda aku Mu belekela. Ameni.

²²¹ [Mukwesu Ben Bryant wati, “Mukwesu Branham, Ndi jisi bana bone mu moyo wangu ku ciindi eci. Akaka sa inga wabakombela?”—Mul.] Masimpe ndacita, Mukwesu Ben.

²²² Taata Wakujulu, oyu mwaalumi wabona bana bamwi baniini kabasika kuli Kristo, nkabela woopolola, mbuli wis, ku bana bakwe baniini. Elyo Muuya waleta bana aba baniini ku cipaililo, akube kuti oyo Muuya nguwenya ufulute bana bakwe, Mwami. Ko cipa. Twa bapa kuli Nduwe, Taata, mu Zina lya Jesu Kristo.

²²³ Lino mbuli nobantu baniini mbo mujoka ku zyuuno zyanu, Ndi yanda onse uli mu muncali kusukana maanza a bana aba baniini, na kuba umauma mbuli mbo bajoka. Nywebo nyoonse mujoke ku zyuuno zyanu, nzila *eyi*. Alimwi amulekele onse alya aumeume buyo bantu baniini. Elyo tula muyanda a myoyo yesu yoonse. Muli zizo zya Mubili wa Kristo, mbuli kunji buyo muli Nguwo mbuli bamwi besu.

Tuya bumacching’ a kutanta Zioni,
Zioni, mubotu mubotu;
Tuya bumacching’ a kutanta Zioni,
Oyo Munzi wa Leza mubotu.

Atuboole, swebo notu yanda Mwami,
 Elyo atu zibye lutangalo lwesu,
 Kusangana mu nyimbo a kuzuminana kubotu,
 Kusangana mu nyimbo a kuzuminana kubotu,
 Elyo obu kuzunguluka Cuuno cabwami,
 Elyo obu kuzunguluka . . .

Oko nkwiimba kubotu kwanguzu! Atu tambike maanza esu ono.

Tuya bumaccing'a kutanta Zioni,
 Zioni, mubotu mubotu;
 Tuya bumaccing'a kutanta Zioni,
 Oyo Munzi wa Leza mubotu.

Atu sukane buyo maanza aumwi kuciindi notwiimba ono.

Tuya bumaccing'a kuyaku Zioni,
 Zioni, mubotu mubotu;
 Tuya bumaccing'a kutanta Zioni,
 Oyo Munzi wa Leza mubotu.

²²⁴ Lino twiimikile a mitwe yesu kikoteme, kuciindi notu . . .
 Koi lizya Mukwesu Teddy, buyo ii . . .

²²⁵ Ndi jisi nkumbizyo zimwi awa, a tutambala a zimwi zimbi. Kwayanda twa kazwa ku masi alandukwa lwizi. Billy wali kundaambilka kuti bajisi tubbusu tobilo tuzwa ku muvwanda muniiini okuya mu England, tutandila kulampa *obo*, muntu muniiini waka lemana konse. Elyo twa elede kukombela oyo, awalo.

²²⁶ Elyo aboobo . . . [Mukwesu Ben Bryant wati, "Mukwesu Branham, akaka ndijatile ku kunyonganya mubandi, pele komba kuti, oyo wakauma mootokala wesu masiku ainda, kumbele lyafenda yangu kululyo, komba kuti aka yubununwe. Komba kuti Mwami aka ciyubunune."—Mul.] Amen, Mukwesu Ben, Ndila cicita ncobeni eco. [Mukwesu Branham wang'ung'una lwakuti, *Tuya Bumaccing'a Kuya Ku Zioni.*]

²²⁷ Mbili mbo tu macching'a, Mwami, tu lizi kuti oyo Mwaala wakaumwa uli moonya mukati kwinda kuli ndiswe, Busyu bwa lyonse ibwa Maanzi aazwa ku Mwaala weenda a Mbungano. O Leza Utamani, twa angulule, cifumo cino, lusyomo muli oyu Leza ulaa ndiswe. Ndi lizi kuti Ula cita, mbili buyo mbo tukonzya kujana luzyalo kuli Nduwe, kuti Ula konzya kutu syoma kuba Anguwo. Ikuti na Wa Upa kuli ndiswe mu bunji loko, kwayanda inga Twa ubelesya buteensi, Mwami. Pele ikuti na twa jana luzyalo kuli Nduwe, aku citike.

²²⁸ Mukwesu wesu waamba kuti umwi wakauma mootokala wakwe. O Leza, tu lizi kuti muntu tajisi mali akucita zintu ezyo. Nda komba kuti Uyo leta mulombwana kunsi lya kuzulwa, na cintucimwi, kuti aempwe ku kucita ceeci, boola, kwaamba,

“Mukwesu, Njo ubambilula mootokala wako, Nda kacicita.”
Gwasya Mukwesu Ben a bayandwa bakwe.

²²⁹ Awa abikkidwe janza lyangu kuli tutambala a nkumbizyo, jisi lusyomo muli Leza oyo. Musa waka jisi lusyomo muli Leza oyo, nkabela wa kazabuka Iwizi. Daniele waka jisi lusyomo muli Leza oyo, nkabela waka gusigwa mu bulyango bwa balavu. Shadreki, Misheki, a Abedinego, baka jisi lusyomo muli Nguwe, a kuzima mulilo.

²³⁰ Paulo waka jisi lusyomo muli Nguwe, nkabela buzuba bumwi cindi miswaangano niyakali miyumu kapati nkabela Paulo taka konzya kubweza oonse muntu, wa kabweza buyo katambala, wa kati, “Ndi syoma kuti Leza uli andime.” Wa kabikka maanza akwe aatala lya tutambala a tusila, nkabela myuuya mibi yakazwa ku bantu, alimwi kuciswa malwazi akazwa kuli mbabo. Leza, Ndi jisi lusyomo muli Leza nguonya. Akube kuti mubi azwe. Kuciswa, malwazi, kupenzegwa, akube kuti zizwe, Mwami.

²³¹ Nduwe Leza nguonya wakaamba kuli ndime kumusanza muli oyo Musumpululu wa Mulilo, kumusana ku mulonga. Ndo Nduwe ujisi cifoto Cako cilengelela awa a ndime, aa bwaanda. Uli andime, Mwami. Nkoli lyonse, oyo nguonya Musumpululu wa Mulilo. Elyo twa kabotelwa Maanzi aazwa ku Mwaala abuzuba, mbuli mbo tusangana mu Muuya. Mpawo, Uli waano. Tuli jisi kaanzambwene muli Nduwe, Mwami. Tuli jisi lusyomo muli Nduwe. Tula syoma kuti Uyo tunanika aku tugwasya. Kutali ku bulemu bwesu, Mwami; inga twaba mbuli Musa kaindi, cindi na kalubizya cintu. Tu yanda kucita cintucimwi cakugwasya Nduwe, Mwami. Obo mbo bukanze bwa moyo wesu, kugwasya Nduwe, ikuti na tula konzya kucicita. Kotu tondezya, Taata, kufumbwa eco Neo yanda kuti tucite.

²³² Elyo ono, aa mucito wa lusyomo, Nda tapatila kuciswa oko kwiimininwa a tutambala otu, a nkumbizyo ezyi. Kuyo siya bantu. Ndi lizi kuti Uyo cicita, Mwami. Nda cisyoma, mu moyo wangu, kuti Uyo cicita. Ponya kuciswa koonse akati kesu cifumo eci.

²³³ Kovuna abo batambika maanza abo, abo baamba kuti bayanda kusika ku Mwaala, wa Maanzi. Leza, akube kuti babe anyota maningi sunu, akube kuti kube buumi buzwide munyo kuli mbabo, kusikila ku kabacitye kufwanyota ya Kristo. Ko cipa.

²³⁴ Koba andiwe sunumasiku, Taata. O Leza, andi zibe, kwinda mu nkumbizyo ezi, zintu zili mu myoyo ya bantu. Ikuti na taakwe cili ku moyo wabo, mpawo, Mwami, Kondi pa cintucimwi caku kambaukilila myoyo yabo sunumasiku.

²³⁵ Longezya Mukwesu wesi Neville, a mukaintu wakwe, mukwasyi wakwe; mbungano yesu nsyoonto, basyomesi besu, bamadaikona besu, bamamembala besu. A Mubili Wako uli

koonse, koba andiswe, Taata. Twa tuula eci ku maanza Aako,
mu Zina lya Jesu Kristo.

. . . Zioni;
Tuya bumaccing'a kutanta Zioni,
I Munzi mubotu wa Leza.

Lino atu lwiimbe buyo, nconzyo, kasimpe kuli Nguwe ono.
Mwabona?

Atuboole, swebo notu yanda Mwami,
Elyo atu zibye lutangalo lwesu,
Kusangana mu nyimbo a kuzuminana kubotu
Kusangana mu nyimbo a kuzuminana kubotu,
Elyo obu kuzunguluka Cuuno cabwami,
Elyo obu kuzunguluka Cuuno cabwami.

A myoyo yesu kiikoteme ono.

Tuya bumaccing'a kuya ku Zioni,
Zioni, mubotu mubotu;
Tuya bumaccing'a kutanta Zioni,
I Munzi mubotu iwa Leza.



I MAANZI ALIKO LYONSE AAZWA KU MWAALA TNG61-0723M
(The Ever-Present Water From The Rock)

Oyu Mulumbe aa Mukwesu William Marrion Branham, wakakambaukwa lutaanzi mu Chikuwa Munsono kuseeni, Kunkumunamasamu 23, 1961, ku Branham Tabernacle mu Jeffersonville, Indiana, U.S.A., wa kagu sigwa kuzwa ku rekordi yamagnetiki teepu a kulembwa cakutagwisyacintu mu Chikuwa. Obo busanduluzi bwamu Chitonga bwa kalembwa a kumwaisigwa aa Voice Of God Recordings.

CHITONGA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Kuzibya Kwa Nguzu Zyakkopi

Nguzu zyoonse zilitamininidwe. Eli bbuku inga lyalembwa ku purinta yaku ng'anda ku kubelesya kwamuntu na kuvozegwa, kakutakwe kubbadelesya, mbuli cibelesyo ca kumwaisya Makani mabotu aa Jesu Kristo. Eli bbuku talikonzyi kusambalwa, kulembululwa muciiimo cipati, kubikwa aa webbusaiti, kuyabolwa mu ciyanza cakujokolosya, kusandululwa mu misyobo iimbi, na kubelesegwa kulomba lugwasyo lwa mali kakutakwe kuzumizigwa kulembedwe kwabumboni aa Voice Of God Recordings®.

Ku makani aamba na cakubelesya cimbi ciliko, walombwa kukwaba ku:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org